

列
朝
詩
集

列朝詩集

丙集第

三

王威寧越一十五首

柯詹事潛二首

劉讀學儼一首

丘少保濟八首

馬少師文升一首

倪宮保岳一十一首

董尚書越二首

梁少師儲一首

費少師宏六首

毛少保紀二首

林宮保俊二十一首

王僉都雲鳳三首

馬左都中錫五首

倪尚書謙三首

楊侍郎守陳三首

彭宮保華一首

何尚書喬新五首

劉宮保大夏一首

章尚書懋一首

謝少傅遷二首

劉少傅忠一首

楊少師廷和二首

楊少師一清四首

喬少保字三首

王尚書鴻儒一十四首

陸少保完三首

周宮保用 八首

劉侍郎玉 八首

許少傅讀 一首

趙武靖輔 一首

王揮使清 一首

邵嚴州珪 二首

夏評事銛 四首

張興化琦 二首

楊主事榮 六首

鮑員外楠 二首

杭布政濟 二首

杭副都淮 二首

浦麗水瑾 五首

王威寧越

越字世昌濟縣人景泰二年進士廷試日旋風掣其卷闕去逾年高麗貢使携以上進占者曰此封侯萬里之徵也天順中以御史超拜右副都御史巡撫大同進太子太保兵部尚書成化十六年偕汪直朱永出塞大破虜於威寧海封威寧伯十七年佩征西前將軍印鎮大同延綏直敗奪封編管安陸弘治七年虜犯西塞急公年七十有二起總制寧夏甘涼經略哈密復大破虜于賀蘭加少保兼太子太傅十一年卒於軍贈太傅謚襄敏公姿表英邁慷慨英發歷西北諸鎮身經百十餘戰其於邊徼阨塞虜

情錫吏將士情僞無不瞭若一二出奇制勝動有成算獎拔士類驅使材
勇撈籠顛倒人皆樂爲之用在廷鎮夜雪張燈豪飲瓊帳中小校偵虜事
者刺報甚悉公喜以金甌酌酒坐而飲之已卽以金甌與之校得賞益暘
其所欲言公大喜指女伎尤麗者謂曰若無妻乎以此予之紅鹽池之役
半夜襲虜以逆風往返虜不爲備以其能用小校退卒置間謀得嚮導之
力也威寧喜爲詩纔豪奔放不事雕飾酒酣命筆一掃千言使人有橫槊
磨盾悲歌出塞之思至云鬢爲胡笳吹作雪心因烽火煉成丹則又讀而
悲之

與李布政彥碩馬僉憲景陽對酌

相逢無奈又離羣樽酒休辭飲幾巡自笑年來嘗送客不知身是未歸人
馬嘶落日青山暮鴈度西風白草新別恨十分留一半三分黃葉二分塵

次趙廣文韻

欲問黃花借落英老從籬下避虛名可憐世態如雲變安得人心似水平
終日遺懷唯仗酒幾年絕口不談兵溪山只在衡門外贏得清閒了此生
次韵答馬大理天祿

幾經破虜戰場中回首微勞總是空
樂水我常慙智者移山誰不笑愚公
閒來愛飲三杯酒老去羞談兩石弓
虛負聖恩無以報葛衣何敢怨淒風
獨坐感懷

倚遍曲闌愁似海滿庭風雨盡其冥呼門有客憐孤注競醉無人問獨醒
離恨春隨芳草綠歸心暮入遠山青
舊時學得幽蘭操彈與鍾期一段聽
走筆送謝太參

捲地風寒聲冽冽夜深吹落關山雪
夫君何事遠相過一片冰花凍髣髴
結便呼斗酒澆離腸談笑氣吞胡海熱
三十年來契闊情無端又作匆匆別
屈指長安多故人見君應問天涯客
爲言兩鬢已婆娑獨有此心猶似鐵
吁嗟我老不足憐塞上征夫淚成血

丁亥中秋

瑟瑟西風吹雨晴可憐佳節在邊城
百年人有幾時健一歲月無今夜明
魯酒爲誰澆戰骨商歌空自怨和盟
睢陽已死汾陽老羞對兒曹說用兵
寄王宗貫冢宰

謫居古郢兩年多往事傷心可奈何
正是賈生方忌器不知曾母已投梭

閏年我值黃楊厄下里誰聽白雪歌寄與同年老家宰平生才氣半消磨

自詠

自嘆儒官拜將官談兵容易用兵難世間惟有征夫苦天下無如邊地寒
髮爲胡笳吹作雪心經烽火煉成丹朝廷公道明如日俯仰無慙處處安

春寒

二月邊城雪尚飛年年草色見春遲不知上苑新桃李開到東風第幾枝

謝安圖

高臥東山歲月多放情聲妓欲如何後來始爲蒼生起却聽桓伊席上歌
長安懷古

渭水橋邊獨倚闌望中原是古長安斬蛇赤帝留神劍墮淚銅仙泣露盤
帝錦爲帆天外落霓裳成隊月中看不堪回首風塵後北斗城荒雁塔寒

過紅石山

冬來天氣正嚴凝紅石山高策馬登風向眼中吹出淚霜於髯上凍成冰
平胡豈止如擒虎用將何須似養鷹記得去年經此地鐵衣流汗苦炎蒸

夜坐

感昔懷今坐夜深悠悠身世任浮沉三緘已銷金人口百鍊難消鐵漢心
春甕有天藏酒聖草堂無地着書淫不知誰是鍾期耳乘月時來一賞音
寄王司馬公度

坎止流行總付天功名何用苦憂煎樽中有酒宜歡飲世上無人再少年
六國竟銷蘇子印萬金空鑄鄧通錢悠悠世事俱成夢但得清閒卽是仙
村樂

愛飲村醪懶賦詩此中真趣有誰知教成白鶴如人舞買箇黃牛當馬騎
除草澗邊春意足啣雲洞口夕陽遲吟成獨坐空庭久正是紗窗月上時
倪尚書謙

謙字克讓江寧人生有奇質目光如電體有四乳正統四年進士一甲第
三人歷編修至學士下獄謫戍開平赦還復官與子岳同入史局改南京
掌院終南禮部尚書成化十五年卒贈太子少保謚文僖詩集多至二千
餘首

童戲圖

曲闌護春小閣內芳草芊綿織新翠屏山牡丹開暖風吹墮輕紅粉香碎

誰家兒女蜀錦襠柔髮初剃靛色光兩兩三三戲晴晝
懽呼競出花臺傍軟韉木架雙旗挿綵繩低垂畫板滑
向前推送身轉高架上連環韻鳴軋脚尖背蹴香塵
飛珠汗微沾金縷衣丹青假面恣塗抹舞腰更把爛
斑圍嬌娥並坐遺針線手弄折枝情戀戀花腔小鼓
閒不敲竹馬金鐙拋地徧玉蜺撲燒意自癡紫蘭綠
葉紛離披君不見聖主仁恩致蕃育四海民物陶
春熙

雪景爲毘陵陳公懋賦

江天雨雪路盡迷層峰壁立瓊瑤梯蒼松凍合玉
髯老翠篠寒壓銀梢低屋底幽人常閉戶最愛銀
華絕纖汗碧蔥牛啓捲書幃手把青編映輕素村
南有客隱者倫一肩壺榼來叩門遙知相對飲五
斗紅光滿面春風溫人間此景良不惡林泉似傍
蘭陵郭會須乘興訪元龍共倚江樓招白鶴

南郊草堂爲陳天錫賦

選勝南郊結草堂幽清絕似午橋庄林鳩喚雨山
光暝畦稻舒花水氣長攜酒秋清觀納稼杖藜春
晚看條桑菜盛獻享修祠罷合族筵開樂未央

柯詹事潛

潛字孟時莆田人景泰二年狀元官至少詹事兼翰林院學士掌院事教習庶吉士承詔受業者李賓之諸公也翰林後堂有二柏爲先生手植號學士柏造瀛洲亭以臨之而劉文安爲院長渫井於其旁柯亭劉井詞林至今以爲美譚喪亂之餘鞠爲茂草不知遺跡今何如也

山水圖爲兵部郎中王恕題

玉堂清署春風前焚香看畫皆神仙畫中風物得真意峰巒隱約披雲烟大山如龍欲飛去小山盤盤如虎踞奔流一道破山來散作濤聲滿江樹遠村微茫三兩家古渡無人橫斷槎近村第屋蔭榆柳門前沃土饒桑麻別有高亭向洲渚斜日滿簾水禽語滄波浩浩欲吞天蜃氣昏昏欲成雨初疑匡廬山下落星灣又似洞庭湖上之君山瓊宮貝闕倚霄漢無乃蓬萊方丈非人間我生慣識山中樂隨意雲樓與山閣故鄉一別今十年石洞梅花幾開落臨圖忽憶舊遊踪便欲沿溪上丘壑此身留滯未應歸回首江天雲漠漠

僊溪龍華寺

寶幢山下烟霞古老樹如龍欲飛舞花氣薰成五色雲泉聲散作千林雨

我愛溪山事事幽錦袍醉踏東風遊題詩淨埽巖頭石把酒還登竹小樓
空門自與人間別夜榻焚香臥清絕明朝長嘯拂衣歸閒却溪風與山月
楊侍郎守陳

守陳字維新鄞縣人景泰二年進士官至吏部右侍郎兼詹事府丞贈禮
部尚書謚文懿在翰林三十餘年有東觀鑾坡桂坊諸集李西涯爲序
不寐

客夜耿無寐其如鐘漏稀入簾霜氣重當戶月華微切切候蟲語蕭蕭寒
葉飛擁衾成未歎不是爲無衣

送僧歸吳

一錫南飛度碧空寶坊遙在白雲中定知門外青松樹別後新枝已向東
春寒

劉讀學儼

二月燕城煖漸回北風吹雪徧樓臺春寒畢竟無多日桃李何須怨未開
儼字宣化吉水人正統七年狀元除修撰官止太常寺少卿兼侍讀學士贈
禮部侍郎謚文介有集行世

宮詞

霜月照簾櫳開簾獨凝佇玉闌花斂房金井桐垂乳風傳百和香羊車往何許嘿嘿整雲鬟鴉啼俄向曙

彭宮保華

華字彥實安福人景泰五年會元選庶吉士授編修成化二十一年以禮部侍郎入直內閣二十三年以宮保爲尚書致仕弘治九年卒謚文思

明妃曲

抱得琵琶不忍彈胡沙獵獵雪漫漫曉來馬上寒如許信是將軍出塞難
丘少保濬

濬字仲溪瓊山人少孤七八歲能詩敏捷驚人景泰五年進士改庶吉士歷官掌詹尚書弘治四年年七十餘兼文淵閣大學士直內閣八年卒於官贈太傅謚文莊公博極羣書尤熟國家典故平生作詩幾萬首口占信筆不經持擇亦多緣手散去今所存瓊臺集尚千餘首

輓伏羌伯

一代知名將三邊屢建功帝憐何力義人比稗侯忠異鳥鳴牙上盤蛇墮

鏡中九原終不作大樹起悲風

座中有搗筆者作白翎雀曲因話及元事口占此詩

胡運消沉漢道興瓊車宵遁土城平興隆無復殘笙譜勞正誰和舊斧名
起輦谷前駝馬迹居庸關外子規聲不堪亡國音猶在促數繁絃引白翎
得過且過

得過且過多福何如少遭禍乾千山頭凍羽乾真信鳳凰不如我得過且
過華山有鳥名寒號虫方春時鳴曰鳳凰不如我至冬毛羽皆落則又鳴
曰得過且過藥中五靈脂卽其義也

行不得也哥哥

行不得也哥哥十八灘頭亂石多東去入閩南去廣溪流湍駛嶺嵯峨行
不得也哥哥金兵追來陸斷石至章貢幾及之時人有詞曰天晚正行予
春山啼鷓鴣蓋言行不得也

不如歸去

不如歸去中華不是胡居處江淮赤氣亘天明居庸是汝來時路不如歸
去元至正十六年子規啼于居庸

過會通河有感

清江浦上臨清閘，簫鼓叢祠飽餒餘。幾度會通橋上過，更無人說宋尚書。

客中對月

萬里思歸客，傷心對月華。欲憑今夜影，回照故園花。

金陵卽事

六朝宮闕久蒿萊，紫蓋黃旗市運開。鳩鵲滿傳雲外觀，鳳皇蕭奏月中臺。

千山峰勢連吳越，萬里江流自蜀來。此日金陵非昔日，子山詞賦莫興哀。

何尚書喬新

喬新字廷秀，廣昌人。景泰五年進士，除刑部主事，歷官副都御史。南京刑

部尚書弘治初，召爲刑部尚書，請老去，謚文肅。有椒丘文集、博學多聞爲

詩多援據典故

秋懷二首

驚飈撼庭樹，秋氣慘悲涼。玄鳥已遠逝，羣鴻亦南翔。幽人抱遐思，攬衣起

傍徨。念昔少壯日，志輕杜陵狂。淹留竟何成，鬢髮倏已蒼。平津爲漢輔，汲

生老淮陽。感彼積薪歎，悽然心傷。

離菊翹芳蔭井梧墮輕碧榮悴諒有時世情何役役寒蛩亦何求
水夕端居澹無營玩物聊自適春華雖可娛適口美秋實得馬未足欣亡
羊亦非戚生年知幾何撫卷悼往跡乃知滿園樹不若道傍櫟

題蘇李泣別圖

黃雲黯欲暮歸騎慘將發醞酒上河梁羞與故人別後會不可期請與君
求訣祈連山前箭沙漠塞中雪君心與我志各欲效忠節老親坐誅夷此
志遂蹉跌今君獲生還竹帛炳貞烈顧我墜家聲有懷共誰說韓王昔降
虜茅土世不絕念我先飛將守邊號環傑臣罪固當誅臣族詎宜滅嗟嗟
全軀臣誰肯爲論列我心豈忘歸望鄉心如熱親族靡孑遺念之肝腸裂
慟哭送歸旌哀哀淚成血君歸謁茂陵毋爲遂結舌寄語霍將軍此心宜
識察

題金人出獵圖

陰山寒颼捲晴雪白草蕭蕭凍欲折戎王校獵曉合圍萬騎蹴冰如蹴鐵
狐裘狐帽紫絨條上凌大磧下深壕虜騎咆哮聲震地毛羣無計可潛逃
鴛鴦憂憂來何許一片晴雲蔽天半海青直上勢且雄頃刻平蕪洒紅雨

紛飛鷗鵲與鶯鶯雨血風毛墮獵塲羣酋獻獲戎王笑割鮮野食駝蹄香
金輪半墜西山缺繞管嘲轟向區脫解鞍繫馬未肯眠笑擊黃犂飲其血
白旂忽動幹難河猛士更比金源多柴潭已涸蔡州破狡兔雖肥奈爾何

柴潭樓在汝寧

金源立國雄且武蹴宋殲遼跨中土豈知中葉漸陵夷虢闕憑陵有蒙古
燕京南遷到汴京花帽不守杏花營黃河已失合達死猶欲假息懸瓠城
懸瓠額額近荆楚京湖亦有復讎舉長圍已合牧魚麗癡心尚恃柴潭固
柴潭樓下碧漪漪上有伏弩下潛螭一朝決之入汝水螭亡潭涸竟奚爲
幽蘭軒中苦復苦分取遺骸藏宋園當年忠烈冠華夷惟有忠臣忽斜虎
馬少師文升

文升字負圖禹州人景泰二年進士爲御史歷官左都御史兵部尚書弘
治十四年拜吏部尚書正德初坐朋黨除名贈太傅謚端肅立朝五十餘
年名聞夷夏事具國史

泰龍道中

問俗昔曾過隴山西征今復出秦關鴈聲叫日迷寒清楓葉經霜帶醉顏

世路羊腸千里山功名觸角幾人閒林間鸚鵡能言語笑我年來兩鬢斑

劉宮保大夏

大夏字時雍華容人天順八年進士選翰林庶吉士出爲職方郎中歷官右都御史總督兩廣拜兵部尚書正德初逆瑾矯詔繫詔獄謫戍肅州瑾誅復官致仕贈太保謚忠宣公讀書東山草堂人稱東山先生有集若干卷

西山道中

曉來聯騎踏晴沙風景蒼蒼一望餘幾處白雲前代寺數村流水野人家鶯啼別墅春猶在馬到西山日未斜回首不知歸路遠九重宮殿隔烟霞

倪宮保岳

岳字舜咨上元人父文僖公謙奉命祀北嶽母夢緋衣神人入室生公遂名岳公瓌偉秀異目光炯炯望之若神天順元年進士入翰林爲編修歷侍講至學士弘治中爲吏部尚書贈少保謚文毅本朝父子爲翰林得並謚文自公父子始並有集行世

題胡馬圖

大噴飛沙白於雪北風怒號海水裂
髯胡把控正愁寒地上騏驎汗成血
騏驎元出注水中朝刷天河暮崢嶸
飄飄四駿盡龍種風神各異筋骨同
紫燕飛兔思騰踏走狗蒼鷹氣蕭蕭
颯雄姿自足畫圖傳奇材豈與鶩駘合
一匹雖復標格存試出還空冀北羣
伏櫪誰能保終惠行邊猶解策高助
可憐共飽沙場草無由一騁千里道
天涯霜露莽蕭條祗恐驂驅易衰老
髯胡髯胡不敢騎好從重譯獻彤墀
玉臺閭闔閭清峻却看黃帽蓋鞍時

孟春奉陪廟享紀事而作

祠殿森嚴楯陸重雍歌初徹燎烟濃
虞周典禮千年合文武衣冠百辟從
日影漸移高閣漏露華猶拂御街松
却瞻天仗東風裏冉冉霓旌導六龍
孟冬時享齋宿院中和韻答克勤賓之二同年

玉署沉沉隱畫牆柳陰深覆御溝傍
鈞陳天近通三接奎壁星明共一堂
地迫自驚塵土隔雲深翻覺路岐長
叨忝此會元非偶二十年餘白鷺行

甲辰正元奉命南郊看牲

漏轉重城夜不扃兩街高炬燭青冥
影連貔虎塵隨路香拂犧牲月滿庭
已信卜郊唯魯史却看滌重周經
明朝復命紅雲殿鶴立金門候曙星

弘治紀元戊申二月十三日侍從親耕籍田用程學士韻二首

南郊晴旭晃燦儀天路無塵進輦遲京兆青箱依耒耜攸坊花鼓應旌旗
明禋早致先農享粒食仍歌后稷詩聖主重民親稼穡此生幸際昌期
龜貅萬竈繞城圉禮重親耕指近郊豐稔早占種穆種泰和端叶地天爰
弄田何足論鈎盾勞燕真看出大庖詔許三農瞻日表不須前燕擁蒲梢
時有詔庶民終畝者許耕田是下

齋宮候駕次西涯學士韻

銀河如壁護重關翠輦初臨大祀壇映日牙旗環禁旅連空甲騎擁祠官
風雲已覺爭春麗雨雪先驚入夜寒禮罷天門重整珮歡騰萬國正迴鑾
是日大雨雪

新春感事

烽火邊城角悲黃沙漠漠北風吹關山遠隔雲中戍車馬新屯霜上師
賈誼有才思報國杜陵多病爲憂時侍臣誰有如椽筆擬撰燕然第二碑
同寅章德懋黃仲昭莊孔易以言事去職爲之太息書此自示不

寄三人

悠悠往事不堪論
默默窮愁淚暗吞
敢向明時傷遠謫
獨憐壯志付空言
楚人但識湘閭去
漢室誰知汲黯存
愧我同官未同事
端居真已負君恩

厓山大忠祠

人間惡鳥栖金屋
海上樓船駕颶風
國破忠臣惟有死
天亡卷土亦無功
英雄俛仰成遺恨
元氣分明託數公
千古翔龍何處是
精魂依舊進行宮

芳池春水

芳池一曲接銀河
分得天家雨露多
新漲受風牽翠縠
好山隨月墮青螺
百年蘋藻沾餘澤
三月魚龍湧漫波
猶記臨流泛春酌
倚闌同和濯纓歌

章尚書懋

懋字德懋蘭谿人
成化二年舉進士第一人
入翰林除編修與莊昶黃仲昭諫內廷張燈杖闕下
謫知臨武縣羅倫亦以論起復謫官時稱翰林四諫
改南京大理評事陞福建按察僉事致仕家居二十餘年
召爲南京祭酒陞南京禮部侍郎辭去嘉靖初進南禮部尚書
致仕年八十六謚文懿

禁中聞鶯

禁苑花殘盡漏遲
鶯聲遙在萬年枝
不隨舞袖歌金縷
却伴仙韶奏玉墀

長信夢回欹枕處
玳闌吟罷倚闌時
東風空費如簫舌
不道明廷有鳳儀
董尚書越

越字尚矩寧都人
成化五年進士及第
第三人入直經筵
出使朝鮮多所撰述
官至翰林學士南京
工部尚書贈太子少
保謚文僖集四十二
卷李西涯爲序

和彭先生入閣述懷韻

鵬翔凌摩在絳霄
玉清高處領羣僚
寧無尺五歸時論
會有登三報治朝
商弼夜淡方入夢
堯衢日出已聞謠
頭顱自信多公道
白髮從渠不肯饒
和師召太常留別韻

地近蓬萊尺五天
青綾番直記當年
多才已獻長楊賦
感舊頻歌伐木篇
樹乘夜闌真夢寐
車當明發且留連
晨霜匹馬趨朝路
却憶南州正晏眠
謝少傅遷

遷字子喬餘姚人
成化乙未狀元弘治
八年以少詹學士入
直內閣歷官少傅禮
部尚書武英殿大學
士康陵卽位忤逆瑾
罷歸嘉靖六年再召
晉謹身殿次年致仕
贈太傅謚文正

偶興

曲徑疎籬擁薜蘿晚風紅落荳花多南山夜半牛堪飯東海門深雀自羅
遺恨未酬三顧寵清時誰解五噫歌謾將舊硯臨池洗莫遣餘生待墨磨

習靜

一塵不到水邊亭掃石焚香畫掩扃方沼萍開魚掉尾高崖松動鶴梳翎
轉臨絕澗涵虛白山隔重湖送遠青更是晚來羣動息空庭仰臥數流星

梁少師儲

儲字叔厚順德人成化十四年會試第一正德五年以禮部尚書直文淵
閣加少師歷華蓋殿正德十六年致仕嘉靖四年卒年七十七謚文康有
卷洲集若干卷

元夜

尊前休問夜如何且聽佳人達曙歌圓月向人偏皎潔緒風吹面正清和
星從左个將春至鴈向南樓帶字過翹首五雲最濃處千鴈應助聖顏酡

劉少傅忠

忠字司直陳留人成化戊戌進士授翰林編修性峻少通幾三紀始拜翰

林學士正德初爲講官規諷剴切將陞南禮部侍郎進吏部尚書用焦芳薦徵入翰林正德五年以吏部尚書入直文淵閣進武英殿次年致仕嘉靖二年卒贈太保謚文肅

武廟哀詞和魯南韻

千古橋陵舊霽開斷驚無力挽天回三邊曾納戎王款九廟親俘漢渚來
淚竭華夷枯海濱神遊冥漠馭風雷十季講帷承恩澤白首荒山不盡哀

費少師宏

宏字子克鉛山人年十六領鄉薦十九登成化丁未進士廷試第一人正德六年以禮部尚書直文淵閣九年致仕嘉靖初召還六年致仕十四年再召進華蓋殿卒於位贈太保謚文憲公在武廟時以守正拒寧底人事具國史世廟再起枋政上政暇輒與討論詩詞御製詩輒命恭和至盈卷帙御製七言詩有睠茲忠良副倚賴未讓前賢專令名之句安仁濃思疏言詩詞小技猥勞聖躬且使宏窺意指竊恩遇以凌朝士假結納以救過上報之殊弗爲動亦不甚譴責也當時大臣其枝悍無禮如此

次寇巷西涯兩公先帝忌辰悲感倡和之韻

傷心垂朱與和弓此日晨思九宇同花壓玉欄應厭世鳥依金粟自呼風
物資乾柏疑天墜憂切豐亨在日中禁苑久叨供奉職至今淚血洒殘紅
南吏侍羅圭峰考滿赴京至良鄉以折臂乞歸中批遽從之作此
奉寄

咫尺論心恨未能薊門南望睇空凝憂時定復添華髮醫國真應屬折肱
歸喜冬簷支睡枕行當霜路蹴層冰欲知諸老拳拳意不減韓翁惜孔丞
十二日早發良鄉復雨

出郭朝來正喜晴通宵飛雨又縱橫泥汗厚土乾何日雷殷秋山怒未平
老馬識途空有志寒蟬抱葉欲無聲雲師爾罪真難赦何敢常藉日月明
雪中崇之送麻姑一尊謝以前韻

醒眼寒窗對白虛馬軍容值臥瓶初呼童旋覓團臍餅謀婦方烹巨口魚
蕉葉淺斟能稍稍梅花欲放正疎疎心交久矣醇醪醉豈必肝泉味有餘
謝姜寬送芋子

芋魁相送滿筠籠應念冰盤苜蓿空此日蹲鴟真損思當年黃獨漫哀窮
蒸時不厭葫蘆爛煨處還思榴袖紅自是菜根滋味好萬錢誰復羨王公

食梅

夏木陰陰雨氣寒半黃
肥顰摘林端齒輪赤子先掛軟唇爲蒼生故自撻
調劑功微慚玉鉉賜沾
恩重憶金盤一株留取當階樹贏得花時索笑看

楊少師廷和

廷和字介夫新都人成化戊戌進士至德三年以南京戶部尚書入直東
閣嘉靖二年晉太傅不拜以議大禮忤旨力求去令致仕尋削籍隆慶初
詔復故官謚文忠公博通練濟相業歸然具在視草餘錄及子慎所撰行
狀事在國史不具列焉

送周少宰秦府分封

少宰分封出御批二函新冊爛金泥恩波入渭天潢近使節臨關華嶽低
銓事暫辭流內外民風兼問陝東西肩輿不覺驅馳倦餘興猶能及品題
送神武蔡千戶致仕還湖州進士中孚之父

神武掛冠歸舊隱赤松相伴話長生車前紫氣青牛引天上新聲綵鳳鳴
軍務不關惟白戰醉鄉何處是烏程太湖合是逃名地畫舫絃歌自在行

毛少保紀

紀字維之掖縣人成化二十二年進士弘治十三年以禮部尚書入直東閣晉武英殿嘉靖三年致仕謚文簡嚴分宜作墓誌稱其平居手不釋卷老而彌篤作文渾厚典實一根於理

武廟輓歌二首

玉輦今何處宸遊事已空淚多湘水竹悲切鼎湖弓汗簡千年後鈞天一夢中空餘舊戎帳金甲凜霜風北伐威方震南征駕始迴未違天日表獨使肺肝摧帳殿三秋迥鈴歌萬國哀羊車空未巷寂寂望重來

楊少師一清

一清字應寧雲南安寧人父徙巴陵又徙丹徒年八歲以奇童薦入翰林成化八年進士由中書舍人歷提學副使太常卿弘治中以副都御史出理馬政正德中以右副都御史再出總制陝西諸邊入爲戶吏二部尚書直內閣嘉靖初卽家起兵部尚書提督軍務陝西召入內閣罷歸謚文襄公生而隱宮貌類寺人才情敏給汲引士類海內爭趨其門提學陝西賞識李獻吉召置門下故石淙類藁屬獻吉評點行世而獻

亟稱公之

詩筆與長沙並駕蓋當成弘時長沙爲一世宗匠獻吉並舉湯李不欲使
專主齊盟軒楊正所以輕李也文章千古事非一家私議而獻吉之用心
如此於兩公則何所加損哉

將至涼州

雉堞連雲十里城將臣開府此屯兵山連虎陣千年固地接龍沙一掌平
塞上馬嘶春草綠村中人和凱歌聲祗因邊徼無烽火忘却關山是遠行
一
五月七日先皇帝忌辰次涯翁先生詩韻

向城攀望鼎湖弓猶憶合香侍從同周詠恩深餘湛露虞絃響絕更薰風
傷心遺詔龍沙外一清在邊聞遺詔注目宸容豹尾中六載歸朝無寸補
輕車空踏軟塵紅

希大司馬扈駕至淮安便道過江訪余石淙精舍感今憶昔口占
一首

停雲回首意如何楊子江頭一棹過老去多情憐水石閒來開眼看風波
門牆舊侶彫應盡燈火通宵話轉多更約扁舟和月宿荻花深處聽漁歌
嘉靖四年奉詔督師西征再蒙溫旨有趙克國馬援之褒感而有

述

西北風塵帝顧多老臣承詔出嚴阿便宜欲上趙克國翼樂還非馬伏波
十乘戎行新節鉞三邊精采舊關河極知君命如山重感激渾忘兩鬢皤
林宮保俊

俊字待用莆田人成化戊戌進士刑部員外郎極論妖僧繼曉下獄謫姚
州判官用王三原論救敘復南部擢雲南副使湖廣按察使移疾歸起拜
右僉都御史提督巡江改撫江西復召以副都御史出撫湖廣改四川平
藍鄙諸寇加右都御史嘉靖初召爲工部尚書改刑部抗論時政多所執
奏上詰責甚峻以不得其職乞致仕八疏乃允加太子太保致仕謚貞
肅公舉進士李長沙亟稱之曰當以文名世楊石淙評其詩曰詩宗唐杜
晚乃出入黃山谷陳無已間初視之若有隱語久而咀嚙悠然有餘味
焉

兵書峽 在歸州荊溪口

巫峽山西來昂伏知幾變扶輿轉磅礴渾沌開生面中擘行懸虎晴碧天
一線石根浪文摺龜竇相貫穿最高壁斗間衣褶橫素練參差綴紅雪黃

雲覆葱蒨其巔翳叢木澆窮元古殿三發連嶽峯殘簡隱約見世傳此云
書異人之所撰大始留至今文字磨滅半坤靈護取將亦曰下雷電吾
蜀漢地吳魏經百戰趙宋亦後服俘囚始郡縣皇明取明昇旋既不遺而
急峽掌爲平安流歌禹甸祗今薌溪航上下日百遍誰悲蜀道難蜀景有
餘戀理極亂恒倚黃巾焰微燭飛書數上聞宵旰重西眷素翁久收局詔
起填行院兵寄老一身支撐出門倦仗劍追昔遊征衫泪爲濺辭家月千
里許國心一片瀕春雨綿密迴峽風良便願言掃妖氛黃石授終卷

鐵門扇

灝西一舍許兩山勢迴合巨石狀城門鐵衣護周匝楚蜀相大才乾坤互
闢闔當關一夫守萬馬不敢發片雲翕入玲瓏元氣凝吐納風搜羣竅開
水樹聲互答推蓬暫此清巫山事雜沓

嚴田王節婦紀

十九入君門一歲不曾滿夫君事遠征歸別意款款鴻雁各有歸水流不
復返繁華一春夢命薄遭世短姑邊猶遺孩婦影燈長伴嫁被雙鴛鴦相
隨穴中媛

巖田仇節婦紀

晴時一轉瞬花開不常好委身事夫君百歲期長保梅實猶未仁孤墳已
青草簾前語春燕未與傷懷抱有生終有滅值幸遲與早孤存亦夫存念
之憂心禱爲植墳上松松長妾應老

東林寺

初日上蒼涼嶂巒接大荒懶雲依鳥徑馴虎臥僧廊水碧聰明井燈青慧
遠堂禪心秋共寂徙倚近香牀

別鄉人

驛路迷燕浦官梅動越陰相看今日意同是故鄉心鶴徑寒沙口漁船綠
柳陰於洲有奇事未老欲抽簪

題清上人山房

亂松溪古寺衰謝白雲期生滅慧燈盡晴陰定磬知簷虛江色遠日薄鳥
聲遲杖錫西來意曹溪亦幾支

瑞州行臺除夕

綵仗泥牛罷曉鞭春來歲去重相憐客途風雪庚申夜官燭文書癸亥年

經略才疏懸鑄錯誅求攻苦望更紘東巡
叵作澄清地具紙歸心到上前
文峰書院次韻

太平端合老人龍臥隱城南江上峰筆訝草玄高起冢膏因繼尋憤燒松
花間得句諸兒續月底吹簫二客從閉戶著書秋更晚隔溪烟樹夕陽重
讀唐人錢起詩黃綬罷來多遠客青山何處不愁人之句

林園樂事頗相關不換神仙祗一閒荒徑也須存白菊愁人元不是青山
將雛野鶴飛還舞釀蜜崖蜂去却還涼月孤舟自濃睡乘流知下幾溪灣
右堽寫懷

露宿官山月轉晴山堽老淚寄蒼生檄書夜下秋前捷野哭時懸枕上聲
墟落鶯鴉荒骨亂石田狐鼠晚蒿平經心門井溪來血流入瞿塘水尚腥
北巖寺

兩川搖抗尚遲留耳落邊聲結素愁草閣陣旗江郭靖雲移仙蓋野堂幽
時危附驥思屠狗日短歸心寄飼牛黍竊三朝今老憊驅馳何計足消憂
到芋原志喜

眼前三日是回程萬死天容脫此生官燭對牀翻老淚城笳落耳誤邊聲

峽江今度風波隔驛使初傳猿鳥驚臥病老臣無氣力勉又雙手賀昇平
勸駕述懷次東所韻

霜前黃葉漫秋山瘦竹疎花共晚開老去筋骸翻自念日來雲水信相開
經心楊柳三眠外作意棋枰一著閒好是內庖羞獨割凍梨慙改故時顏
盛山紀事

胸臆霜青白鴈羣小堂對柏日西曠繁星江接巴文水淡墨山開盛字雲
井切三潮兵幸沈岡當一火玉爲焚具知野骨封侯券靜夜寃聲觸處聞
通川感事

老銷髀肉愧征鞍目對人心日轉難盡索丁奇翻戊校幾烹丙穴侑辛盤
馬鳴路黑邊塵滿巷哭堂深短燭寒惆悵亂階誰首事范陽無地葬衣冠
風木爲康子肅題

遯鶴斷歸期攤書懶挂頰山月冷不眠雨聲戰寒葉

秋齋爲周彥通題

暑伏涼又生蟲吟葉已故壯日苦不常翻書落寒蠹

題畫

獨屋芝草香衡門落松子輕舟泛芙蓉明月在秋水

閨懷

幽絃不成聲手生欲誰訴平安兩字書開落幾花樹

看梅偶成

消息東風兩月前西湖索莫老逋仙雪蓬昨夜還扶醉移近梅花一處眠

喬少保字

字字希大衆平人成化甲辰進士受經李長沙楊石淙之門與李獻吉王伯安切摩爲古文累官吏部尚書謚莊簡公叅贊留都當威武南幸之日有社稷功世廟初以議禮去高臥不起正嘉之間歸然爲鉅公長德歿後三十餘年王元美爲晉泉訪其詩序而刻之要之公固不必以詩傳也

舟中次楊郎中君謙韻

聞說江南唱子規北人初聽不勝思祇看世路長爲別不道仙舟尚有期漁浦杳聞烟外笛酒家遙認月中旗郎官白雪難爲誦欲和空慚下里詞

幕府山

說着看山興欲飛湖西雙筵踏露微寧辭九日登高會况是諸軍奏凱歸

林外鐘聲開宿霧江頭帆影送斜暉亦知歡會何終極霜露休教上客衣

秋風亭下泛舟

荒庭寥落野烟空漢武雄才想像中簫鼓應聲開畫鷁帆檣飛影動晴虹
山分秦晉羣峰斷水入河汾兩派通少壯幾時還老大不須回首歎秋風

王僉都雲鳳

雲鳳字應韶遼州和順人父佐南京戶部尚書六歲時尚書公與坐客論
易及馬爲行地之物公從旁問曰何者爲行天之物得非龍乎坐客大驚
成化甲辰進士授禮部主事疏劾太監李廣下獄降知州陞陝西提學僉
事歷副使按察使召爲國子祭酒以右僉都御史巡撫宣府丁尚書憂服
闋遂不起甲辰歲晉人得雋者公與王瓊喬宇號河東三鳳厥後皆爲名
卿虎谷晉溪白巖三公名滿天下事在國史不具列

玉泉亭次石邦彥韵

八駿西遊何處蹤白頭僧老記曾逢雲邊羽蓋擎仙掌樹裏樓船駕海龍
日下晚山投宿鴈峒迷秋浦渡寒鐘紅蓮似抱美人恨愁倚霜風憔悴容

晚步天津

山光翠疊老龍鱗故國遺墟草自新世事盡隨伊闕水行人獨踏漢宮塵
北邙高塚元無主金谷殘花不繫春却恐杜鵑今再至天津橋上客傷神

送客

春濕蒸雲雨欲絲飄飄遊子別離時愁看陌上青青草送盡行人總不知

王尚書鴻儒

鴻儒字懋學南陽人少穎悟讀書過目不忘爲府史佐書郡守段容思見
而奇之使爲弟子員敎以經術蔚爲大儒成化丁未進士由戶部主事歷
官吏部侍郎南京戶部尚書謚文莊相臺崔銑稱其閎朗光大言無支浮
服儒誦書弗因官輟邊武得權政門旁雜鼠憂飲泣如困葛藟嚴却介之
義絕養交之私上下遠近咸推爲大雅君子云

自興縣赴保德州途中作

綠崖狹徑半空行俯瞰川原夢亦驚疎樹帶烟低若薺方塘涵水小於枰
雲邊紫塞臨蕃帳天際黃河繞漢京莫遣壯心容易耗青編不載腐儒名

擬楊鐵崖小遊仙

五首

酒壚客舍已塵埃憶與回公舊往來鐵笛一聲塵夢醒岳陽樓下水如苔

太華峰頭夜半過，鐵船搖蕩玉池波。山精竊候希夷睡，偷採池中十丈荷。
方壺圓嶠月初生，海色如銀萬頃明。一片綵雲當面墮，東華童子召飛瓊。
戲拋白鳳下清冥，黃鶴樓頭雨正晴。十八女郎歌勸酒，人間誰識是龍精。
一別良常歲月賒，茅君相念寄瑤華。五雲閣吏無人換，猶是當年蔡少霞。

京華秋興

三首時武廟南幸

鵷鵠高寒紫殿陰，金壺銀箭夜沉沉。洞簫賦美當誰聽，統扇詞工謾獨吟。
暫符長楊沿漢制，終思茂草戒虞箴。屬櫜猛士應多從，傾耳西風玉輦音。
病歸計苦難成，形影蕭然在帝京。中世功名殊不易，殘年去就自須輕。
寶符臨代胡應遁，玉馬朝周客已盈。未睹金根還紫禁，菊花何意向人明。
泚泚黃雲覆白沙，鐵衣荏騎迫中牙。氊裘踰漠烽纔息，虎帳傳餐士不譁。
金矢射麋寒磧遠，玉鞭盤馬夕陽斜。凱歌入塞期非遠，鵠望應憐百萬家。

自渾源起大同道中

僕從衣裘薄，溪山冰雪深。西風吹劒首，曉日照琴心。慷慨平胡策，淒涼出塞吟。
書生徒有志，但恐二毛侵。

沁州道中

十年江左宦情關此日并門復強顏細柳依依標北道生烟漠漠護前山
數聲清管鳴蛙沸一點黃塵揆騎還回首中原渺千里白雲飛處是鄉關

讀東漢外戚傳

金貂赫奕侍中家恩託椒房寵莫涯連苑高樓臨紫陌傾城名妓按紅牙
君王自是光明燭豎子終爲頃刻花所惜覆車無戒者青編常遣後人嗟
至後三日雨雨連夜復三日

江南冬月氣猶溫風雨瀟瀟至後繁鍾阜雲迷禪寺塔秦淮潮上酒家門
閒來訪戴難乘興老去遊吳易斷魂何似鄉關醉呼騎短衣衝雪獵平原
送范齋李先生致仕還吳

春色俄看到枳花江東行客理歸艤世途水馬波難泝吾道人龍迹已遐
安世平生多氣節少陵老去憶桑麻袖中未有留戲疏羞向燈前看莫邪

馬左都中錫

中錫字天祿故城人成化甲午省試第一乙未舉進士拜刑科給事中疏
劾萬昭德之弟再疏再得杖瀕死不悔出爲雲南僉事改陝西陞大理少
卿以右副都御史巡撫宣府武廟初起撫遼東召爲兵部侍郎劾罷瑾黨

冒邊功傳陞者瑾恨之矯詔改南京工部尋罷官械繫遼東盡鬻田廬償
遼鎮芻糧乃得補職爲民瑾誅起撫大同流賊抄掠山東河北召爲右都
御史往督軍務陞左都御史掌院事以老師玩寇徵下獄踰年以疾卒御
史盧雍追疏其冤予祭一壇天錫早惠三歲識字七歲能賦詩爲文有雋
才刊落凡近於詩尤工評者謂其體格早類許渾晚入劉長卿陸龜蒙之
間

述懷和敖靜之韻

幾年騎馬走黃塵富貴邯鄲一欠伸世上雞蟲無了日山中猿鶴已嗔人
文園臥病思封禪宣室求賢問鬼神讀罷古書長大息小簷花落又殘春
西掖晚歸有感時事聊賦述短章用呈同志者

矮窻缺月照人寒殘雪留簷凍木乾衰信已憑雙鬢寄世緣聊作一枰看
斜封官好空批敕神武門高米掛冠悵却登山與臨水十年騎馬走長安

早春自述

杏花雨過柳花風睡起凭闌酒正中一碗午茶麈醉北半溪春水帶愁東
泥香乳燕窺簾入巢拙鳴鳩借樹同試問春光還幾許少年人病已成翁

次敖靜之九日言懷韻

騎馬聞雞有底忙，一秋憔悴沈東陽。身隨杖竹空存節，鬢比籬花不耐霜。帝載八年紛奏績，王師六月苦周章。何須更落西風帽，黃葉填門獨舉觴。

晚渡咸陽

野色蒼茫接渭川，白鷗飛盡水連天。僧歸紅葉林間寺，人喚斜陽渡口船。表裏山河猶往日，變遷朝市已多年。漁翁看破興亡事，獨坐秋風釣石邊。

陸少保完

完字全卿，長洲人。成化丁未科進士，拜御史。正德七年，以都察院都御史討流賊蹙之於狼山，殲焉。拜兵部尚書，改吏部。武宗崩，追論宸濠復讞衛事，下獄。謫戍鎮海。卒於泉州。旅次多暇，自次其詩文爲水村集二十卷。少保才氣雄傑，江海殲渠勲在社稷而不克以功名終，博雅好古，精於鑒賞，余得其所次集草藁，惜其遂無傳也，爲略存之。

王元章作墨梅并題長句書其後

月落參橫興已空，鑑湖清淺夜推篷。消磨不盡惟豪氣，猶在疎花淡墨中。武城道中夜聞作吳語而歌者彷彿竹枝遺響，因爲二章。

數間茅屋隱平沙
隔岸微聞喚酒家
若道消愁全仗酒
也停雙櫓倩人除
不奉君歡又一年
背人啼向落花前
當初自愛儂如玉
今日如花更可憐

周宮保用

用字行之吳江人
弘治壬戌進士
授行人遷南京工
科給事中出爲廣
東參議歷副使布
政召爲右副都御
史歷吏刑二部侍
郎工刑二部尚書
以左都御史加太
子少保特詔爲吏
部尚書卒於位贈
太子太保謚忠肅
公歷宦四十餘年
忠公勤恪顧自爲
詩動盈卷帙書法
俊逸尤善繪事余
嘗爲公諸孫末年
刪定其詩得百餘
篇今錄其什之一
云

靜觀

地偏心更遠
臥起了無譁
養拙從吾道
流年感物華
讀書餘左氏
看竹但西家
數點朝來雨
新開木槿花

至徐州

遠戍收宵柝
高風動雪車
三年同旅鴈
一飯厭河魚
赤葉寒林曉
黃茅野市虛
昔時溪水上
日出臥溪廬

沽酒

一春白髮鬪絲長無奈春歸
喚酒嘗日曬一林梅子熟風吹滿店柳花香
漢江初潑葡萄綠銀海頻浮琥珀光消得百年三萬日不妨還醉六千場

簪花

老去風流敢自誇開筵對客
許簪花百年回首仍春色三月於人且物華
乘興不須憎白髮聞歌猶復戀烏紗花前莫笑山翁醉賸有青錢付酒家

落花
四首

幾日繁花亦有姿便教飛盡
只空枝明年有約休孤我昨夜無風欲怨誰
蜂慰苦心甘辦蜜蠶羞衰髻
薄縈絲鶴林縱謂猶堪賞携酒明朝已怕遲
粧華倚豔欲無功到處芳菲
人眼空薄影萋迷聊借月後時衰謝不緣風
簾鉤淡逸聞幽鳥篆跡依稀
見小蟲清曉關情應不免數枝惆悵杏園東
撼白欺紅恨已多新詞莫遣
雪兒歌數株欲借羣芳後三月猶看幾日過
錦席剩香留一瓣銀屏淡影
感雙蛾離魂轉覺難憑藉盡日風吹無奈何
滿樹春紅已覺稀數枝低閣
午風微裁將織女愁中錦盡着秋娘嫁日衣
南國何人歌芍藥東山此日
憶薔薇中園未忍違孤賞拾得餘芳肯暮歸

劉侍郎玉

王字咸栗萬安人弘治丙辰進士授監察御史正德初抗論劉瑾八黨罷歸瑾誅起河南僉事福建副使陞南京僉都御史以舟師援安慶有功世宗卽位留掌都察院明年以刑部侍郎閒住贈尚書謚端敏羅欽順志其墓謂博通載籍尤長於天文地理凡軍謀師律儀章法制皆詳究其本末楊慎選定其集凡三卷

回龍驛

牽路遶村斜舟行聽早鴉負囊趨遠渡提甕立平沙日出雲生葉風回浪起花太行天際碧吾亦憶吾家

歸途

晚晴回玉勒歸路擁瓊花紫霧蒸山氣清輝蕩日華剡波冰掛壁髡樹凍凝槎勞役何須問窮生更可嗟

世降

六籍逮狂秦三王跡已陳虞淵初息駕滄海又揚塵猿鶴皆君子豺狼有故人祗存丹竅理常與日華新

宿房村下

歷歷數長亭舟行晚未停歸雲衣疊嶂落鴈字寒汀古渡稀聞棹孤村遠
見燈壯懷慙旅泊禁漏憶晨興

謾興

縛茅爲屋倚山椒名姓人傳太古樵白石曉炊雲山甌清泉夜瀝月盈瓢
釣魚懶過雙溪堰驅犢時臨獨木橋寄謝長官休物色多年洗耳向唐堯
寄挽陸水村

垂老南遷已斷魂更堪荒草塞孤墳鄒陽尚恐吳王重袁盎寧忘漢室尊
千古是非勞士論百年榮辱悞君恩交遊落落誰主眼獨向天涯酌酒尊
大梁城

新春謾興

杖藜門外問浮槎路隔溪南處士家梅子漸肥梔子瘦黃鸝啼盡雨中花
許少傳讚

讚字廷美靈寶人弘治丙辰進士襄毅公進之子也由推官徵拜御史改
翰林編修正德中謫外稍遷僉事歷布政使人爲刑部侍郎升尚書改吏

部嘉靖丙辰以一品六載考績入直文淵閣乙巳冬乞休忤旨削籍歸里謚文簡公德性溫粹意氣凝定讀書爲文老而不倦有松臯集行世

初入棧道

梁漢起天中形連百二雄萬山爭地立一路與雲通樹杪過人影崖頭嘯虎風我行三月暮悵望華陰東

趙武靖輔

輔字良佐鳳陽人成化三年爲都督同知征夷將軍平兩廣蠻封武靖伯建州酋董山入寇克征虜將軍總兵左都御史李秉督軍率漢番京邊官軍五萬討之縱兵深入多所斬獲山降誅之進封流侯世襲伯爵

奉和觀車駕祀南郊

御堤新築淨無埃大駕親承祀事來風定燼烟浮袞冕日高仙仗護蓬萊鸞旂紛擁雲衢合雉扇遙迎翠輦開更有羽林嚴宿衛桓桓多是出羣才

王揮使清

清字一寧濟寧人都指揮

塞上感懷

西風關外雪初晴懷古思鄉百感生玉帳枕戈人萬里鐵衣傳箭夜三更
夢回絕域烏桓地戰罷空山敕勒營烽火微茫天去遠月中鴻鴈送秋聲

邵嚴州珪

珪字文敬宜興人成化己丑進士官至嚴州太守李西涯云邵文敬善書
工篆詩亦有新意如江流如白龍金焦雙角短之類又有半江帆影落尊
前之句人稱爲邵半江今其詩名半江集殊無佳什不免楓落吳江之歎
錄楊用修詩鈔所取二首

胡冬官梅花圖

江南江北霏霏雨漁榜漁簪短短離斜出一枝青鳥外東風掩映水仙祠

馬鬣虎

天門名馬真龍媒萬里新自流沙來先皇知爾才磊落放入虎園與虎搏
霜蹄蹴踏虎即斃英風颯爽來天際當時觀者應歎嗟唐家豈有拳毛騶

夏評事鏃

鏃字德樹天台人成化丁未進士除南京大理評事懇疏乞終養居鄉砥
礪名節游泳詩文年八十三詩名赤城集

前有樽酒行

玉壺乳酒一色同素手提來笑春風笑春風聽我歌流光火急將奈何默
坐青軒散桃李不如抱殘發陽阿乘健出遊遨開懷恣歡謔前有一樽酒
何用銀毬繫牀脚

遊金山寺還舟中流作

縱是裴公寺能忘魏子心帆開吳日落鐘度楚雲深半餉分南北中流弔
古今江山雖好在無奈二毛侵

中山

雙峰遙溼處少頃雨聲稠野鼠行詩卷山禽掠酒籌海天先得暮江月只
宜秋一笛誰家發隨風到上頭

廣陵

九曲池亭龍氣消誰家水調共蘭橈眼前亡國無多恨江水東邊是六朝

張興化琦

琦字君玉鄞縣人家貧弱冠游學吳楚間每誦讀至夜分與其徒吸水喫
面醒則又誦讀弘治戊午舉于鄉明年第進士年已及艾矣授南大理評

事歷寺正多所平反陞興化知府監司累上治狀以疾力乞骸骨陞本司左叅政致仕歸二十年而卒自少至老刻意攻詩嘔心刻腎力去陳言有白齋集十卷覽者多憐其攻苦焉

黃昏步溪上見烟月可愛

明月在天烟在溪烟中看月無光輝沙禽熟眠潮未響野火歷亂船初歸天邊楊柳誰家樹烟月相舍不知數此時幽景記不真莫是江南夢歸路

春詞

乳鶯啼急柳枝低江雨晴來草葉齊九十日春無酒伴落花如夢到棠梨

楊主事榮

榮字時秀餘姚人成化壬辰進士以工部都水主事視河壽寧家于禁寘平法卒爲蜚語所中下詔獄釋歸尋卒襟度夷曠南冠而縶不廢吟咏書學懷素尤善寫竹孫大章官至刑部左侍郎

江西旅懷

客夢家千里鄉心柳萬條片雲遮海嶠一雨送江潮戀闕綈袍在懷人尺素遙春光看又晚何處灞陵橋

宿武陽川

天外鳥歸盡川原月上初落花孤嶼寂殘燭短篷虛異語聞商稅長歌識
夜漁因悲湖海迹已是十年餘

號宮送河丞市馬

野色正蒼蒼秦山半夕陽雕弓雙羽箭寶劍百金裝夜月臨關白秋雲壓
塞黃君休市千里當寧漢文王

子規啼

江天夏夜露氣清山鳥忽作腸斷聲莫道啼多不鮮意催人歸去最分明
村南逢病叟

吳宮

星星黃髮被雙肩甲子推來近百年昨日病來猶證死教兒忙辦買神錢
畫棟雲消夜氣清宮前溝水作秋聲如何醒得吳王醉多少花枝壓禁城

鮑員外楠

楠字良用歙縣人成化甲辰進士弘治中累官南京戶部員外郎
題画作

茆齋半食蒼岩腹老樹如蛟瞞寒綠出門買得東吳船載酒歸來江上眠
剗却橫洲一千尺長將醉眼傲江天

舟中

野渡溶溶春水夕陽點點寒鴉款乃數聲何處行人一棹天涯

杭布政濟都御史淮

濟字世卿淮字東卿宜興人濟仕至布政使淮至都御史與季空同結社
謝政之後兄弟徜徉林壑倡和成集

次韻楊柳枝詞 濟

玉溝紫繞水烟涼嫩葉垂垂空地長百尺官牆遮不盡飛花猶自入昭陽
東風裊裊拂朱闌萬樹千條露未乾玉簫聲中人不見倚樓烟雨正春寒

送徐石東僉憲湖南分韻得瀟湘 淮

瀟湘他日夢今上合江亭天闊浮吳楚山青入洞庭鷓鴣春渺渺斑竹雨
冥冥舟戢雲中見依稀帝子靈

浦麗水瑾

瑾字文玉無錫人正德辛巳進士授麗水令尋卒博瞻有文與邵文莊善

每有著述多與商確子應麒官至宮坊贊善

閒居漫興五首

草堂幽事許誰分石鼎茶煙隔戶聞長日如年雙燕睡晴風似酒百花醺
軟莎新步青絲履濃墨閒書白練裙稍待溪南荷葉滿扁舟十里看紅雲
雨熟枇杷樹樹香綠陰如水晝生涼客疎却喜階苔厚身懶初便簟竹光
陽羨紫茶團小月品江白苧剪輕霜投壺散帙還隨意消得人閒白日長
此身閒外復何求長日安居事事幽隔竹敲茶妨鶴夢臨池洗墨戲魚浮
風牽翠帶翻階草雨溼紅銷落海榴散盡飛蟲生晚色月明已上水東頭
高梧樹下足涼風滿地清陰一畝宮階戰閒看排陣蟻簷喧靜覓課衙蜂
日斜天外初微雨雲薄樓西忽斷虹客至莫談塵底事年來多病耳初聾
南里橋東一草堂烏皮隱几竹方床池萍漲雨青浮岸隣樹分陰綠過牆
乳燕出時炊麥熟鴈蛾飛後曝絲香不知何處炎蒸在日日清風灑葛裳

列朝詩集

丙集第三終

列朝詩集

丙集第四

陳簡討憲章 一百一十九首

張南安弼 八首

羅修撰倫 一十三首

王新建守仁 四十七首

陳簡討憲章

覽吳聘君與列二首

莊郎中景 二十七首

鄒吏目智 七首

憲章字公甫新會人正統十二年舉人身長八尺目光如星右頰有七黑
子如北斗狀穎悟絕人再上禮部不第歸隱白沙成化十八年辟召至京
不肯就禮部試乞歸養母詔特授翰林簡討自後屢薦不起弘治十三年
卒學者稱為白沙先生蕭田林俊稱其涵養粹完脫落清麗獨超造物牢
籠之外而寓言寄興於風煙水月之間蓋有舞雩陋巷之風焉余觀先生
之為人志節激昂抱負奇偉慨然有堯舜君民之志而限於資地困於譏
詠輪囷結轡發為詩抑塞磊落之志氣旁見側出於筆墨之間借詩講
學間作科譚帽桶脚有類語錄嘗有詩曰子美詩之聖堯夫又別傳後來

操翰者二妙少能兼嗟乎子美亮夫之詩其可得而兼乎東食西宿此真英雄欺人之語而增城湛原明妄加箋釋取爲詩教所謂癡人前不可說夢也先生嘗曰論詩當論性情論性情先論風韻無風韻則無詩矣又曰學古人詩先理會古人性情是如何有此性情方有此聲口人亦有言白沙爲道學詩人之宗余錄其詩則直以爲詩人耳矣王元美書白沙集後云公甫詩不入法支不入體又皆不入題而其妙處有超出於法與體及題之外者余少學古殊不相契晚節始自會心偶然讀之或倦而躍然以醒不飲而陶然以醉不知其所以然也弇州晚年進學悔其少作故能醉心於白沙若是余并識其語鐫於申之以告於世之謬爲古學者

冬夜

長夜氣始淒木綿被重裘端坐思古人寒燈耿悠悠是時病初間背汗仍未收學業坐妨奪田蕪廢鉏耰高堂有老親遍身無完綃丈夫庇四海而以俯仰憂口腹非所營水菽吾當求明且理黃犢進我南岡舟

藤裝二首

一裝費幾藤南岡礪朝斧交加落翠蔓制作類上古吾聞大澤瀨羊裘動

世祖何如六尺蓑滅蹟蘆花渚舉俗無與同天隨夢中語今夜不須歸前溪正風雨

新蓑藤葉青舊蓑藤葉白新故理則然胡爲浪忻戚扁舟西浦口坐望南山石東風吹新蓑浩蕩滄溟黑須臾月東上萬里天一碧安得同心人婆娑共今夕

漫題

日月逝不處奄忽幾華顛華顛亦奚爲所希在寡愆韋編絕周易錦囊韜虞絃飢食王臺霞渴飲滄溟淵所以慰我情無非晚與田仁孫提携衆雛上啼笑高堂前此事如不樂它尚何樂焉東園集芋本西嶺燒松煙疾書歷心胸散滿天地間聊以忙俄頃焉知身後年

和陶歸田園三首

我始慙名羈長揖歸故山故山樵采深焉知世上年是名鳥槍榆非曰龍潛淵東籬采霜菊兩渚收菰田游目高原外披懷深樹間禽鳥鳴我後鹿豕遊我前冷冷玉臺風漠漠聖池煙閑持一觴酒懽飲忘華顛逍遙復逍遙白雲如我閑乘化以歸盡斯道古來然

高人謝名利良馬罷羈鞅歸耕吾豈羞貪得而妄想今年秋又熟謹呼負
禾往商量大作社連村集少長但憂村酒少不充儂量廣醉卽拍手歌東
西卧林莽

近來織畚徒城市售者希朝從東臯耕夕望西巖歸貧婦業紡績燈下成
歲衣但令家溫飽不問我行違

和陶移居

留連晡時酒吟詠古人詩夕陽傍秋菊采之復采之采之欲遺誰將以贈
所思所思在何許千古不同時四海倘不逢吾寧獨去茲願言秉孤貞勿
爲時所欺

和陶飲酒

木犀冷於菊更後十日開清風吹芳香芳香襲人懷千回嚙入腹五內無
一乖雖靡鸞鳳吟亦有鷦鷯棲昔者東籬飲百榼醉如泥那知此日花復
與此酒諧一曲盡一杯酩酊花間迷赤脚步明月酒盡吾當回

和陶懷古田舍

君子固有憂不在賤與貧農事久不歸道路竟徒勤青陽動芳草白日悲

行人沮溺去千載，相知恒若新。出門轉窮厄，得已聊一欣。甘雨滿夕吟，繁
花羅春津。獨往亦可樂，耦耕多近鄰。百年鼎鼎流，永從耕桑民。

秋興三首

西風振庭木，虛堂夜蕭蕭。攬衣起步月，歸馬雙飄飄。天地豈予知，知音不
可招。冥心祈有合，悵望空雲霄。

盛時不得意，衰老徒傷悲。志士曷爲爾，戰兢多見之。翹首面崑崙，白龍有
遺池。振衣一千仞，高詠秋風誰。

海上有一士，來往不知年。或就胥靡飯，或投上方眠。游處各有徒，孰謂世
情然。飲酒不在醉，弄琴本無絃。借問子爲誰，得非魯仲連。

送李劉二生還江右用陶韻二首

夜聞桂樹芳，晨起山鳥喧。客從遠方來，歷我階西偏。手持諸侯書，徵會在
匡山。我願結其人，遂往不復還。滯形宇宙內，俛仰獨何言。

中年見二子，楚楚西江英。問訊徐蘇里，十年有餘情。開尊對溟月，高歌亦
心傾。胡爲別我去，感此秋蛩鳴。贈處各有言，慨然盡平生。

贈李世卿二首

采菊復采菊嚴霜下庭木豈無桃李顏畏此天地肅落落枝上英未傷食
者獨持贈楚人歸投之江魚腹
青青牆下竹冬後色如是燦燦月中花歲寒香不匿新知語未足遠別情
難置獨上江門舟北風日凌厲

有懷世卿

四首

仙鶴去不歸黃鸝向人語空館忽相思雲山杳何許出門望東海默默空
延佇月出潮復來鳴枕下滄海

時雨口夕來郊原鵲新綠白雲被重崖下映寒塘曲情結竹上言魂消井
邊喝三年隔瀟湘書至不可讀

伏枕廬山下春懷慘不舒哀絃久去耳風韻今何如灼灼花自媚嚶嚶鳥
相娛高臺夕流盼古道行人疎

煩囑謝人境抱膝山臺居奈此枝上鳥交交春雨餘少年耳目元衰老不
能虛安得臂連子從之泛江湖

送劉方伯東山先生

未別情何如已別情尤遽豈無尺素書遠寄天一角江門卧煙艇酒醒後

衣薄明月照古松清風灑孤鶴

蔣韶州書至代簡答之

相別何悠悠梅花十寒整音塵中斷絕
官若墮深井忽枉尺素書開讀喜
不定庾嶺秋正高揚旌下松逕君才足理郡韶民日延頸古來水火喻子
產功在鄭歲計諒有餘願聞下車令

秋夕偶成明日鄉試揭榜

缺月不滿簾南牕聊隱几猶聞戶外春
斷續秋風裏犬子試初畢老妻浪
驚喜酒中夜心四海皆名利

自伍光宇墓還登蓬萊絕頂

故人墳前澆我酒白日欲西回馬首
磴危道險不可躋下馬長鬚扶兩肘
三步一噫五步停引吭出舌肺腸鳴
此時平地慮顛踣仰首十丈梯崢嶸
以手捉僕肩以足踏崖頭躋攀欬上
分寸難又恐翻身落深阱山北鳴鶴
鵠山南叫輟輟豹虎伏莽狐狸遊
天地衮衮令人愁小童魚貫上復休
絕頂始得巖巒幽開顏一望隘九州
弱水涓涓扶桑樛中覆一杯滄溟流
穹然青者吾羅浮神仙葛白俱蜉蝣
湖西先生去十秋五羊詩客徒淹留
數

公陳迹或可搜死者已矣吾何憂後來諸生繼前修努力莫倦蓬萊遊

題馬默齋壁

屋後青山屏翳合檐前綠樹煙花匝主人閉門履不納跣趺明月光繞榻
客來問我笑不答但聞山鶯啼恰恰橙橘盈園野芳雜門外一江深映閣
四時八風誰管押樹飛霧走龍騰甲拙者孤舟持酒榼成化十年甲午臘
送客

濃綠新春酒疎紅隔水花官人坐馬醉江路遶山斜桃李成春徑牛羊散
暮沙林泉無宿客興盡且還家

悅城

山作旌幢擁江綰鏡面平舟航乘曉發雲物入冬晴鼓到江心絕槎衝石
角橫經過悅城曲無語笑浮生

四月

四月陰晴裏山花落漸稀雨聲寒月桂日色暖醺醺病起初持酒春歸尚
掩扉午風吹蛺蝶低逐乳禽飛

聞方伯彭公薦剡

當時尊孔孟用世必詩書夫我何爲者先生非過與長歌扶晚醉短髮向
秋疎坐惜籬前水持竿試釣魚

至陳冕家

遠樹晴堪數孤雲暝欲遮自憐江海跡能到友生家落日明江色輕風動
麥花相看吾鬢白不必問年華

古柳寄周京

西來何處水千里不平流入海魚龍喜懷山草不愁雨邊明落日石角上
孤舟寄語周京道勞生不自由

晚步

水國秋先至江村晚更幽泥筌收郭索山網落鰕鮑涼入社門樹陰連渡
口舟獨憐經略地吾得放歌遊

秋坐碧玉樓偶成

造次中秋過商量九日來詩將秋景澹菊共老人開時節陶潛醉江山宋
玉哀平生滄海意不受白鷗猜

病齋用后山韻寫懷

病枕愁更永籠燈對夜長千年無鮑叔一嬾有柴桑兒請栽瓜地妻評作
麴方花時逢酒伴酩酊出扶牆

秋中寄興同前感事韻錄遞東所兼呈雲谷老隱

山人無外事白首稚兒同弄水溪堂背爭棋紙局中盆池秋見月竹院夜
呼風觸事成唐句狂歌向碧空

題新村書齋壁二首

日色催江渡潮痕上石梯趨墟村婦出索哺穠兒啼樹接黃村塢船移白
石溪落花誰省記何必武陵迷

茅棟依岩靜柴門洗竹通桑榆巷南北煙火埭西東一逕漁樵入孤村井
臼同鄰家得美酒吹笛月明中

南歸寄鄉舊七首

家在桃源裏龍溪是假名蕉衫溪女窄木屐市郎輕生酒鱖魚膾邊鱸蜺
子羹行窩堪處處只少如先生
碧草東西埭黃鸝遠近山岩春花氣足檐日鳥聲閑文字虛堆几園林不
設關一條煙際路朝往暮來還

江邊逢野叟又手問官名立雀黃牛近衙魚白鷺
腥西田餘故宅北甌多新塋駐馬斜陽外悽然感廢興

自愛愚公谷誰過野老家時依當戶竹閑數上牆
花鳥立溪槎靜牛爭崦路斜懷中嬌小女學語解呼爺

居士舊茅齋蕭然倚玉臺獨尋寺裏去每到日西回
魚腥水暖風推巖戶開小橋殘板在長訝有人來

省事除煩惱端居養靜虛栽花終恨少飲酒不留餘
山徑兒吹笛村出婦把鋤殷勤謝閭里勝事莫相疎

山童呼犬出狂走信諸孫乳鴨爭嬉水寒牛不出村
墟煙浮竹杪田水到桑根鄰叟忻相遇笑談忘日曛

社西村四首

結茅依里社村以社西名客至惟談稼年衰不入城
鄰雞上樹宿水鶴傍人鳴向晚尋牛去前岡笛又轟

君家里社西我家里社東平分社公雨不隔馬牛風
瓜地妻能種衣巾俗與同雲邊采芝逕高盡玉臺風

社主對諸阡居廬散百煙共來鄉社會同樂帝堯年折花潮沒屐吹笛月
隨船偶尋社西去又賦社西篇
社西逢酒伴埭北有花枝詎識愚公意聊同收豎嫖圍碁松崦久度馬板
橋遲袖有葳蕤草還家不告飢

寄馬默齋

倒載輕輶駕徒行謝衆扶無錢欺老社失策問長鬚山雨醺醺弱林風枳
殼疎待君君不至春盡又何如

次韻秋興感事寄東所

醉眠山影裏恨不與君同松下泉來冷雞鳴日過中就牀梳白髮開戶納
清風起視滄溟暮孤鴻沒遠空

春日江村二首

時候花先覺陰晴鳥自知登山嫌避客得句樂呼兒蔓草披香徑垂楊覆
淺漪美人期未至江月幾盈虧
草帶籬腰綠花簪石頂紅林園開畫景鶯燕語春風山靄霏霏合江流渺
渺東獨來橋畔路高柱過眉節

春陰偶作寄定山

浩浩川流疾冥冥嶺樹陰共憐春錯莫更覺老侵尋宿雨衰花氣朝陽絕
鳥吟誰能盡天道俛仰此懷深

用韻寄廷實

無才慵作吏有酒喜留賓老更耽高卧時還近俗人鍾鳴山寺遠月出土
淋親何處期吾子笙歌玉洞春

喜梁文冠至

駐樂梅村夜風光勝早春直知花是路不覺月隨身草木皆知舊江湖多
賤貧短叢來往數等是最閒人

中秋撥悶二首

疎星圍碧玉秋氣正平分共持今夕酒又減去年人白髮來千丈青山忽
數墳年光付流水萬物信乾坤

晚有悲秋意秋來此夜分可憐清夜酌盡是白頭人紫蓋終携病朱陵願
卜墳誰能天地外別去覓乾坤

旌節亭瓦雀

瓦雀喜亭樓丹青意自迷雨餘穿麗日花底啁香泥並語聲全碎追飛羽
忽低悠悠去繡繳欵欵戀樓題卯育非無地兒羣或引梯慣行書案上漸
滿井闌西不羨雕籠養真堪畫卷携由來親白首那更避青藜狎久如私
昵喧多類滑稽行藏非社燕飲啄混家雞度密千回歇排風幾寸躋冥鴻
於汝輩滄海一萍蹄

西南驛晚望

晚來花雨濕詩囊獨上郵亭望大荒南盡海那諸郡淺西來天上一江長
漁歌落日還孤艇樹隔啼鶯背短牆料理憑高非一事尊前誰與共平章
黃淳曰石齋先生微時不往見瓊臺公以此不合人多言石齋爲所阻以
瓊臺排玉三原之事推之或不誣也石齋詩有南極海旁諸郡淺及山雨
不來昏晝景之句蓋寓意于此觀其祭瓊臺文益信

對酒

竹杪風輕瓦雀哀萬中蕭散步階苔放懷自對溪花笑好事誰撐酒舫來
白髮驚看今日老青春剛到隔年回壯心被酒如飛鶴又逐紅雲上玉臺
茶蘼花開有懷同賞

看花何處發孤吟牆角荼蘼又破金紫豔照人今日態香風吹夢隔年心
多情酒伴來何晚得意遊蜂入每深病起南窗坐終日獨憐涓滴未成斟
與謝胖

風波來往十年身舊事淒涼不可陳當道豈非鉤距手青山半間打眠人
酒腥旅館城南月夢破茱萸海角春何日定携妻子去水田稼好最娛親
南歸途中先寄諸鄉友

不分賓主共林塘脫下朝衫作道裝酒爲老夫開甕盎茗和春露摘旗槍
津頭水滿鴛鴦下牆背風來枳殼香何處與君拚坐久萬株花裏小萊牀
晚酌示藏用諸友

何處氤氳到此溪香林高樹望中迷瘦藤挂月秋山遠破褐隨風晚袖低
臚阜亦開新洞府玉臺還是古招提黃柑白酒誰賓主不放今朝醉似泥
四人把手過龍溪一路梅花了不迷滄海月明三島近白龍天迴衆山低
客携卷子抄詩草兒上松枝掛酒提盡日醉眠岩石上莓苔茵厚不沾泥
東溪牽犬過西溪短屐衝煙步步迷秋竹苔深人語靜古壇松冷鶴巢低
山花折去空盈把春酒沽來不滿提笑把長竿弄江月草間郭索尚蟠泥

丹青不寫武陵溪只記桃花也著迷芳草獨行山路僻白雲相送洞門低
笑呼竹笠前頭拜交付詩囊右手提風月滿山關不住他時須用一丸泥

故兩廣總制朱公歸葬彬陽憲使陶公遣生員陳諫往祭賦詩贈
之二首

銘旌前日別金臺故吏門生安在哉黃葉孤村荆桂老青山連騎越香來
人思舊德聞吹笛烏避新阡下啄苔欲了平生功德狀到時須打墓碑回
黃金誰問買端溪羊祜殘碑我解題一飯可忘公吐握千秋遺愛廣東西
寒瀧急雨飛濤惡夜峽啼猿哭月低不爲高堂兼卧病天涯絮酒肯教携

六十一自壽

世間甲子是何年母鰥雙瞶子亦然十數曾孫羅膝下兩三杯酒笑燈前
尋僧野寺花迷路吹笛江門月滿船聖主萬年歌不足黃河清了鳳翩跹

元旦試筆二首

六載虛勞供奉恩白頭吾亦兩朝臣閭閻擊壤今弘治簡冊編年又戊申
日色小薰穠李晝風光欲醉乳鶯春廬岡此景誰分付也到江門不屬人
天上風雲慶會時廟謨爭遣草茅知鄰牆旋打娛賓酒稚子齊歌樂歲詩

老去又逢新歲月春來更有好花枝晚風何處江樓笛吹到東溟月上時

厓山大忠祠

天王舟檣浮南海大將旌旗仆北風世亂英雄終死國時來胡虜亦成功
身為左袵皆劉豫志復中原有謝公人眾勝天非一日西湖雲掩岳王宮
麓堂詩話云白沙詩極有聲韻厓山大忠祠和者皆不及

飲酒

君莫停杯我為歌我今忘我是誰何避人嫌弄船頭笛對影非無月下蓑
廬阜春雲眠華嶽江門秋水釣銀河竹弓挽住閒人手漸覺年來射鴨多
次韻李子長至白沙

山轉黃雲信脚行西風吹袂五銖輕勝遊自喜多閑日衰病還堪逐後生
白髮我因何事笑黃河人見幾回清看君合伴廬岡睡不獨能詩一技成
邀馬玄真用前韻

閑眠閑坐或閑行身老溪雲病亦輕客至正當秋醖熟船來莫待晚潮生
江山偶得三人對風月還添一榻清蘇日南玄真木榻昨日書來張主事頭顱空
評老無成

次莊定山清江雜興韻

家學華山一覺眠圖書亦在枕頭邊
傍花隨柳我尋句剩水殘山天賜年
竹徑旁通沽酒市桃花亂點釣魚船
平生我愛孫思邈自古高人方又圓

次韻定山先生種樹

花時風日美新晴北汧南垞迤邐行
春色酣酣熏我醉年光袞袞歎人生
竹林背水題將遍石笋穿沙坐欲平
客問定山何所有滿山紅紫數聲鶯
春日偶成

蛺蝶飛飛花映窗流鶯恰恰柳垂江
出牆老竹青千箇泛浦輕鷗白一雙
暖日暄風酣獨卧來牛去馬亂相撞
江山指點非無句誰致先生酒百缸
贈張叔亨侍御

天下元無事勞我有心相携沙上語
山月二更深

訪客舟中

船中酒多少船尾閣春沙
恰到溪窮處山山枳殼花

初晴

初晴樓上燕飛飛樓下歌人白苧衣
一曲未終花落去滿林啼鳥送春歸

贈鈞伴

短短萋萋淺淺灣夕陽倒影對南山大船鼓柁唱歌去小艇何魚吹笛還

絕句

牆角經春卧短筇千秋塔骨不如公科頭坐轉茅檐日閑看蛛絲蕩午風

歇馬大徑山

數家煙火隔林塘一樹寒花晚自香黃葉塚頭聊歇馬鷓鴣聲裏見斜陽

古有所思

采采紅芳日欲斜盈盈珠淚落天涯東風忽見離前樹惱亂春愁不爲花

社中四首

桑林伐鼓酒如川秋社錢多春社錢盡道昇平長官好五風十雨更年年

社屋新成燕子來山丹未落野棠開三三兩兩兒童戲弄水板花日幾回

社酒開顏一百家春風先動長官衙東君也解遊人意紅白交開樹樹花

社日年年會飲同東原西埭鼓鼙鼙無人不是桃花面笑殺河陽樹上紅

秋江喚渡

何處渡頭風浪喧隔波仙景似桃源瘦藤倦向人間去喚得船來便上船

桃花

雲鎖千峰雨未開
桃花流水更天台
劉郎莫記歸時路
只許劉郎一度來

元夕

村南村北此宵同
好景難消一老翁
在處恐妨年少樂
踏歌歸去月明中

喜晴

西林收雨鵲鳩靈
卷被開窗對曉晴
風日醉花花醉鳥
竹門啼過兩三聲

偕一之世卿詣楚雲臺偶作呈世卿

小立三人靜楚雲
水田漠漠向秋分
千峰笑指來時路
黃鶴樓前月是君

和柳渡頭韻荅鄉友

飯罷雕胡坐石磯
白雲閑與鶴同飛
神仙若道吾無分
那得身輕減帶圍

對酒

半開半謝花相催
江水東流不復回
扶杖江頭看花樹
不知笑向酒家來

感事

平生交態如兄弟
此日悲歌聞路人
欲寄秋風兩行字
中原無鴈獨憐君

古耶道中有懷

翠煙浮壠麥初齊
社樹青青獨鳥啼
何處相思不相見
木綿花下水門西

悼周錫

里巷三年六七墳
老年無淚哭交親
數聲願借遼陽鶴
喚醒人間未死人

林張何諸生先後過訪既而別去

春水江門一葉舟
幾人來此看垂鈎
浮雲一散無踪跡
飛盡桃花江水流

宿雲卧軒三首

世間何喜復何悲
風雨蕭蕭過短離
小睡正酣童子問
公今是夢是醒時

不妨到處與人羣
借宿山齋酒半曛
我得五龍傳睡法
枕痕猶帶華山雲

了無意緒向諸緣
到處茅齋可借眠
白日與人同在夢
不應疑我是神仙

謁鄧家山墓

擲谷鶯聲向此沉
遶墳春色爲誰深
紙錢灰冷桐花落
已被愁風捲到心

卽事

照眼春光爛不收
江亭一雨欲成秋
道人不是閒鶯蝶
肯爲陰晴一日愁

聞東山先生奉都憲之命修理黃河

疏鑿紛更日已多
乾坤無奈一黃河
天生會有龍門手
人世空傳瓠子歌

得世卿永興書

山堂見月自鈎簾一榻秋光中酒眠何處博舟來嶽下晚揺山影過湘川
悼陳冕

不飲亦狂飲亦狂醒中說夢醉中忘乾坤早晚蟬蛸化不是芙蓉不耐霜
新年田家

古田同井今同村同坐杯盤到子孫合是田家愛元日白頭拄杖拜人門
春中雜詩

小雨如絲落晚風東君無意駐殘紅野人不是傷春客春在野人杯酒中
梅花下感事

桃李村村待發蒙孤芳憔悴不成叢天涯一寸腸如結吹斷江城曉角風
月夜與何子有飲梅村社二首

溪北溪南踏月遊梅花村落似羅浮東風夜捲殘潮去留得何郎半日舟
人日今年又共君他人交態白頭新開懷一夜梅村酒時復停杯問故人

玉枕山和南安太守張汝弼

一枕秋橫碧玉新金籠閣上見嶙峋使君得此元無用賣與江門打睡人

白沙應詔道出南安太守張汝弼頗以白沙出山非是欲尼其行白沙不可白沙製玉臺巾詩與汝弼往復頗相詆諆白沙作玉枕山詩汝弼復之曰客囊羞溫客衣單那有黃金買此山多少高人眠不着雞鳴催入紫宸班白沙跋之曰東海石齋大家不睡笑殺陳國南也許在玉枕山詩話中

悼彥昭

淚盡西風草木間遊魂暗逐薤歌殘千秋只有無情月遍照松楸處處山
鳴鶴育雛于貞節堂東壁壁高且危二雛墮砌下乃就而哺之悲

將雛無力上棖題聲斷殘陽翅忽低高棟託身君亦誤鵲鵲安穩只卑棲
午睡起

道人本自畏炎炎一榻清風卷畫簾無奈華胥留不得起憑香几讀楞嚴
安磐云公甫自是神學如此詩云云又云天涯放逐渾閒事消得金剛二
部經是也又有詩云是身如虛空樂矣生滅滅公甫神學淵微託出何曾如
宋人所謂改頭換面者耶

附見吳聘君與弼

與弼字子傳崇仁人天順元年用忠國公石亨薦特勅召見授左諭德國辭不拜公潛心理學欲盡削詞章箋注之煩而爲詩則沾沾自喜以爲能事識者哂之詩集七卷不下千首白沙之學得之於康齋以其詩觀之則不啻智過於師也余錄康齋詩二首附見於白沙之後非敢微康齋也以其詩而微之耳

秋晚

風來夜枕寒雲生曉窗雨旅思共秋清遙思故山侶

曉立

靈臺清曉玉無瑕獨立東風玩物華春氣夜來深幾許小桃又放兩三花

張南安弼

弼字汝弼華亭人弘治丙戌進士爲兵部郎最久志操耿耿開口論議無所顧忌常作假誓行以刺時貴出知南安府律已愛物大得民和未久致仕少善草書怪偉跌宕震撼一世東海之名遂流布外國爲詩信手縱筆多不屬稿卽有所屬以書故輒爲人持去李西涯詩話曰張東海草書名一世詩亦清健有風致嘗自評其書不如詩詩不如文予戲之曰英雄欺

人每如此不足信也世傳東海渡江詩六朝遺恨晚山青爲平生佳句乃
虞山錢曄詩誤入東海集中也已見乙集第七卷中

絡緯詞

絡緯不停聲從昏直到明不成一絲縷徒負織作名蜘蛛聲寂寂吐絲復
自織織網網飛蟲飛蟲足充食事在力爲不在聲思之令人三嘆息

假髻曲奉許天爵

東家美人髮委地辛苦朝朝理高髻西家美人髮及肩買妝假髻亦峨然
金釵寶釧圍珠翠眼底何人辨真僞天桃窗下來春風假髻美人歸上公

花鳥圖

天台山裏劉郎來玄都觀裏劉郎去人來人去花不知金衣鳥啼春滿樹
綠窗孤眠如玉人聞道春歸未識春欲起推窗看花鳥還將羅扇障流塵
送趙弘濟春試

題畫贈張廷芳

閒說桃花競笑春玄都道士又更新好携三尺青鸞尾去埽平津閣上塵
雲山蒙董石坡陀閑坐船頭看綠波悵望佳人渺何許竹枝聲斷夕陽多

胡陵城

漢楚英雄逝水東蕭蕭荒壘幾秋風金戈鐵馬酣爭地付與尋常負耒翁
方文美畫

花落春歸客未歸仲宣樓上倚斜暉故園遙在三江外綠遍靡無燕子飛
懷友

飛花渺渺送春歸忽漫鉤簾對夕暉竹下小池雙翡翠銜魚飛過綠苔磯
莊郎中景

景字孟暘江浦人成化二年進士改庶吉士授簡討元宵放燈命史館賦
詩與同官章懋黃仲昭抗疏諫止謫桂陽州判官改南京行人司副居定
山垂三十年召至京徐溥議復翰林大臣不可復司副遷南驗封郎中得
風疾遷延野寺逾年再乞告乃得請孟暘刻意爲詩酷擬唐人白沙推之
有百鍊不如莊定山之句多用道學語入詩如所謂太極圈兒先生帽子
一壺陶靖節兩首邵堯夫者流傳藝苑用爲口實而豐城楊廉妄評其詩
以爲高出於唐人杜子美穿花蛺蝶深深見撲水蜻蜓款款飛比定山溪
邊鳥訝天機語擔上梅挑太極行尚隔幾塵此等繆種流入後生八識田

中真所謂下劣詩魔能斷詩家多生慧命良可懼也荆川之徒選二妙集專以白沙定山荆川三家詩繼草堂擊壤之後以爲詩家正脉在是豈惟令少陵攢眉亦當笑破白沙之口余錄孟暘詩痛加繩削存其不倍於雅道者於白沙亦然楊用修云定山詩有逼真唐人者如羅漢寺溪聲夢醒偏隨枕山色樓高不礙牆病眼殘書楚漢燈前壘小閣江山霧裏詩宿三茅觀荒村細雨聞啼鳥小樹輕風落野花贈人豈無湖水甘神漢亦有溪毛當紫芝若隱其姓名決不謂定山作也

題竹

獨行湘江潯見此叢篁幽風雨日冥晦萬雀聲啁啾垂垂正結實恐爲鷁鷁謀豈無九苞羽飛下十二樓延佇久不見此意良悠悠我因王者瑞極意垂鴻猷採之欲往食道路阻以脩問之在何所乃古西康州西康有西伯已矣三千秋至尊應昌運致此能無由清時一再覩咄哉何所求

養菴爲永興馬貞夫元題

北嶽霜雪幹玉漢強千尋南溟珊瑚枝玄宮極幽深應誰見毫末積效踰山岑撫卷得玩頤隱几亦觀心辭豈白玉受厲須黃金無寐月自生無

覺日自沉回首人間世坐驚復行吟楊然舍予琴誰哉賞此音

蒼松爲許志完作

箕山老人松樹圖開卷凌亂千人呼畢宏已死更誰手南京老盛天下無
此松畫本得何處元是公家挂瓢樹虬髯偃蹇老鐵蟠雷雨蒼龍水騰去
嗚呼此樹百鍊鋼數千萬變冰與霜忠臣義士我所拜山中萬古文天祥
遊琅瑯寺

偶上蓬萊第一重道人今夜宿芙蓉塵埋下界三千丈月在西巖七十峰
江海幾年留老眼乾坤今日寄微踪酒醒無限題詩意起立層巖看萬松
壽柳處士用美宣地官韻

年華不敢去堂堂老戀山光及水光塵夢幾看浮世短白雲交付此杯長
柳根怪石方牀枕眼底秋燈細字行小阮年年無限意長江分遣到壺觴
弔易羽士姜守一

一鶴西來瘦有餘每將生死問何如幾回見我扶還拜兩月來書病不除
枕上希夷千古夢手中莊子十年書人間若果神仙有願候新江舊草廬
用韻寄黃提學

秋老青山色更濃年年此地問元龍
狂搔短髮孤鴻外病卧高樓細雨中
詩寄故人如見面年過五十敢稱翁
何時許作西巖會一日一壺傾一峰
定山西巖奇特甚

濟寧舟中

不管青天問去鴻百年都只此杯中
千家小聚村村暝萬里河流岸岸同
遠樹入河留返照布帆隨力飽西風
南來北往奔波地留與兒童笑老翁
東昌舟中

萬里江湖數起居乾坤歷歷過青徐
得風水遠孤帆外牽月河長百丈餘
俗債可容還醉筆老魔猶與戰殘書
可知酒興今多少自點秋灘問買魚
舟中

暮靄千家望欲平風光著處有詩情
秋燈小榻留孤艇疎雨寒城打二更
石自隔河分別界人將望驛問何程
同行我亦朝天客兩鬢羞看雪亂明
直沽

匆匆光景到香醪萬里天涯兩鬢毛
北海風回帆腹飽長河霜冷岸痕高
寒城歛霧山俱出老句橫秋氣亦豪
拱北樓高滄海近夕陽闌檻倚秋濤

石翁見寄次韻

萬里長風擊楫歌了無此夢挂煙蘿溪山到脚長嫌少車馬臨門不愛多
瓢挂樹梢風漸歷鶴巢松蓋夢蹉跎一聲引子漁家傲兩兩三三唱隔波
書東山草堂扁 二首東山謂華容劉戶部時雍也

封題雲卧東山扁歌咏司空表聖詩天闕星辰遺舊履橘洲歲月有殘棋
石橫流潦潛蚪角梅迸垂蘿屈鐵枝自笑野人閑袖手雲煙濃淡忽交馳
黃落空山滿地知江湖殘線一襟詩是天榮瘁元無意犯手輸贏不會棋
沙苑草非騏驥秋瀟湘竹是鳳凰枝紫虛有約千迴醉笑指僧趺亦坐馳

五羊寄鄧先生俊 二首

後時自許甘丘壑前席將無問鬼神浮世虛名非得已出山小草却悲人
別時笑語風吹斷會處迷離夢寫真四十餘年一回首乾旋坤轉有冬春
遠去江湖志不違今來未覺昔來非眼穿海日籠沙白足倚薰籠貯火微
行客自知無歲暮飛鴻不記有家歸脚跟自有平生路未許緇塵點素衣

疊前韻 二首

又向清湘弄一舟笑將雙脚問清流囊收風月非窮相夢熟煙霞 衡嶽名最

上頭招隱誰甘同寂寞著書獨不爲窮愁稻粱滿地悲鴻舊馴得滄波萬里鷗

蕩蕩白虹揚一舟乾坤孤影在中流風高物外浮溟興天蓋人間岸幘頭歷坂鹽車騏驥病委霜人路菊花愁也知萬戶封侯樂一點真閑不及鷗

答李西涯

十年風雨別長安笑把無窮作夢看縱許浮雲終日定誰知去婦此心難蘋花采采江空遠湘水茫茫道路艱讀罷離騷風偶急釣船吹上子陵灘沈公見寄次韻奉答

婆娑獨對皇天影談笑都來俗子喧芥子須彌還我悶千紅萬紫亦春園心無牛口千秦穆跡繼龍頭愧邨原江上神龜尾方曳放情泥淖不須掀謝天與改官汴泉幕東嶠兄有詩次韻并寄

梁國何曾還嚇我今人情或古人同電懸雙眼欺秋水髻擁三花御野風柱史官來頭已白醉鄉逃去頰初紅吹臺獨上高回首各各溪河落照中郊行

凌兢瘦馬踏春泥雪後郊原綠未齊一抹午煙風隔斷野雞聲在竹林西

釣魚圖

溪上春雲與浪飛，溪頭春水鯢魚肥。
閑人只是閑無事，日出船來月出歸。

端午食賜粽有感

蓬萊宮中懸艾虎，舟滿龍池競簫鼓。
千官曉綴紫宸班，拜向彤墀賀重午。
大官角黍菰蒲香，綵繩萬縷雲霞光。
天恩勅賜下丹陛，璫筵侑以黃金觴。
東南米價高如玉，江淮餓莩千家哭。
官河戍卒十萬艘，總向天廚挽彫粟。
君門大嚼心豈安，誰能持此回凋殘。
小臣自愧悠悠者，救時無術真素餐。

節婦

二十夫君棄妾身，諸郎癡小舅姑貧。
自甘薄命同衰葉，不埽蛾眉嫁別人。
化石未成猶有淚，舞鸞雖在不驚塵。
瑣窗獨向東風樹，歲歲花開他自春。

張秋二絕句

經國終能匏子甘，轉漕萬里出東南。
屯田果得京師計，請爲朝廷拜邵庵。

羅修撰倫

倫字彝正吉之永豐人成化丙戌狀元除翰林修撰抗疏論李南陽起復落職提舉泉州市舶司明年召還復修撰改南京尋以疾辭歸開門教授以註經爲業垂十年卒於退居之金牛山公嗜學好古篤志力行結茅棲息取給隴畝客晨至留飯借粟旁舍比舉火日已近午不以爲意陳公甫爲作傳曰倫才大不及志其青天白日足稱云彝正詩集二卷沈石田極稱其禪房花木塵中蝶淨土池塘劫外魚之句而集本不載

答夏憲剛止菴見贈二首

久病寒衿易覺秋老懷珍重爲東周玄天有意緣隨在紫綬何人爲國謀月桂夜長迷玉兔銀河秋盡隔牽牛雲山十二窩頭路多謝先生夢寐求高堂明鏡萬莖秋屋上西風撼不周鑿沼且留明月住買山初爲白雲謀誰呼鐵笛先招鶴自著蓑衣早放牛道在莫須同出處此心還向止菴求

和緝熙過毛英懋西園隱居

肝腑贏餘五畝春草堂雲暖小山貧塵中物色原無我林下心情見此人鶴伴野翁梳白髮蝶隨春色上烏巾褰衣細問西園老怕有人家可並鄰

和緝熙留別

甲子流年又幾春東風初散馬蹄頻自憐白髮添明鏡悵望青天入暮雲
寒日卧龍遲遠夢冷花幽鶴伴芳辰相逢且盡樽前酒無那滄波欲送人

和荅涪守張兼素二首

昨夜清風度碧山蓑衣初振水雲間流年信我添華髮世路逢君祇厚顏
深樹黃鸝閉自語落花飛燕傍誰還柴門已與山童約明月今宵不用關
春光容易落花輕世路山河算幾程芳草可憐諸老去好風偏爲故人清
也知蝴蝶渾閒夢却笑獼猴亦世情老子婆娑眠不著五更寒極敝裘橫

林緝熙歸會于薌城梁宅和洪城見寄

雲水千峰更萬峰此心期與故人同蒼茫世路浮生在澹泊春杯野興濃
鄉夢幾回前店月蓑衣無恙柳花風明年喚取陳公甫皂帽青天信一蓬

題張氏水村小景

逢著閒人只點頭海邊同我是沙鷗多情芳草舊知己如意好山都上樓
白髮已前渾是夢黃花相與又逢秋年來解得濠梁意却笑游魚誤中鈎

和緝熙同春書臺

萬玉峰頭自在春暖雲晴雨爲誰貧誰知別樣風花手只屬龍衣澹蕩

芳草漫同康樂夢野花盡傍紫陽巾卽呼猿鶴留君住莫問東家更買鄰

題薌城梁得剛書屋用林緝熙韻

乳燕鳴鳩甲水濱小軒幽徑足聽聞生忘芳草翻疑夢寒盡梅花剩得春
世事暗隨燈燼落年華偏戀老翁新芒鞋竹杖身長健頻上金牛醉野人
題漢宮圖

白蛇中斷赤旗開四百年中夢兩回惟有終南舊山色雨餘猶自送青來

別廷揚知縣

釀得新城萬頃春碧桃扶醉不辭頻羅浮山下梅花屋夢裏逢君恐未真

和林緝熙題宜和殿臨韓幹馬

夢入黃鸝紫殿陰天津空費杜鵑心宜和玉輦君休問老在西風五國林

鄒吏目智

智字汝愚合州人少貧居龍泉菴埽樹葉燃之讀書達旦成化二十三年
進士改翰林庶吉士弘治二年星變陳言請退小人用君子黜萬安劉吉
尹直諸人而用王恕王竑彭龍不報次年坐與御史湯鼐等妖言惑眾下
獄免死謫廣東石城所吏目衣結屨穿穀然就道得從陳公甫游其學益

進居四年得疾暴卒年才二十六汝愚介直孝友雅負奇氣據經守正多
所建明三原公應召至京汝愚見之曰三代而下人臣不得見君所以事
事苟且公勿拜官先請見君歷陳時政於上前庶其有濟一受官職再無
可見之時矣三原善其言而不能用也古城張吉克修謂汝愚才識亞於
賈誼而規模次第過之志氣類乎陳亮而能根據義理不事豪俠人以爲
知言云

奉和石齋先生見寄三首

風清月朗蛋船輕到處青天有酒星森森番禹江上水幾番遷客夢中經
山亭水閣此何春瘦馬猶存踏鐵身珍重東風休料峭今年花比去年貧
大忠祠下聘君家一度登門一看花花裏有禽驚異客倩將青箬換烏紗
夜泊馬寧呈胡用晦吳獻臣

白舫青簾幾夜同洞簫聲裏海雲紅百年身世知何處笑倚梅花月正東

金井山居次韻

鐵杖何年入此山今人菴是古人菴春風小圃修花史落日疎林縱酒談
放鶴亭高塵網斷聽鶯橋近野情酣莫辭老背尋常炙寒露侵凌恐不堪

辭朝

雲韶聲靜拜彤墀轉覺嬋媛不自持罪大故應誅兩觀網疎猶得竄三危
盡披肝膽知何日望見衣裳只此時但願太平無一事孤臣萬死更何悲
巡海呈周文郁

逢一疎林酒一行侍兒親倚櫂歌聲
管聞海水如天遠誰放山花似火明
煙外孤帆風正駛苦中欹枕夢初醒
細看斗笠非難製莫遣烏紗累此生
王新建守仁

守仁字伯安餘姚人弘治丙辰進士除刑部主事起改兵部疏劾劉瑾謫
龍場驛丞屢遷南太僕鴻臚卿以左僉都御史撫南贛用禽寧濠功拜南
京兵部尚書封新建伯謚文成事具國史先生在郎署與李空同諸人游
刻意爲詞章居夷以後講道有得遂不復措意工拙然其俊爽之氣往往
涌出於行墨之間荆川之門人專取其晚年詩以爲極則則可哂也王元
美書王文成集後云伯安之爲詩少年有意求工而爲才所使不能深造
而衷於法晚年盡舉而歸之道而尚爲少年意象所牽率不能渾融而出
於自然其自負若兩得而吾以爲幾於兩墮也以世眼觀之公甫何敢望

伯安以法眼觀之伯安瞠乎後矣

化城寺

歸越作

化城高處萬山深樓閣憑空上界侵天外清秋度明月人間微雨結輕陰
鉢龍浮處雲生座岩虎歸時風滿林最愛山僧能好事夜堂燈火伴孤吟

憶龍泉山

京師作

我愛龍泉寺寺僧頗疎野盡日坐井欄有時卧松下一夕別山雲三年走
車馬愧殺岩下泉朝夕自清瀉

憶諸弟

久別龍山雲時夢龍山雨覺來枕簟涼諸弟在何許終年走風塵何似山
中住百歲如轉蓬拂衣從此去

因雨和杜韻

赴龍場作

晚堂疎雨暗柴門忽入殘荷瀉石盆萬里滄江生白髮幾人燈火坐黃昏
客途最覺秋先到荒徑誰憐菊尚存却憶故園耕釣處短蓑長笛下江村

移居勝果寺

江上但知山色好峰迴始見寺門開半空虛閣有雲住六月深松無暑來

病肺正思移枕簟洗心兼得遠塵埃富春只尺煙濤外時倚層霞望釣臺

宿萍鄉武雲觀

曉行山徑樹高低雨後春泥沒馬蹄翠色拖雲開疊嶂寒聲隔竹隱晴溪
已聞南去艱舟楫漫憶東歸阻杖藜夜宿仙家見明月清光還似鑑湖西

夜宿宣風館

山石崎嶇古轍痕沙溪馬渡水猶渾夕陽歸鳥投深麓煙火行人望遠村
天際浮雲生白髮林間孤月坐黃昏越南冀北俱千里正恐春愁入夜魂

羅舊驛居夷作

客行日日萬峰頭山水南來亦勝遊布谷鳥啼村雨暗刺桐花暝石溪幽
蠻煙喜過青楊瘴鄉思愁經芳杜洲身在夜郎家萬里五雲天北是神州

沅水驛

辰陽南望接沅州碧樹林中古驛樓遠客日憐風土異空山惟見瘴雲浮
耶溪有信從誰問楚水無情只自流却幸此身如野鶴人間隨地可淹留

興隆衛書壁

山城高下見樓臺野戍參差暮角催貴竹路從峰頂入夜郎人自日邊來

鶯花夾道驚春老，雉堞連雲向晚開。尺素屢題還屢擲，衡陽那有鴈飛回。
始得東洞遂改爲陽明小洞天 三首

古洞闕荒僻，虛設疑相待。披萊歷風磴，移居喜幽境。管炊就崑實，放榻依石壘。穹室旋薰塞，阿坎仍埽灑。卷帙漫堆列，樽壺動光彩。夷居信何陋，恬淡意方在。豈不桑梓懷，素位聊無悔。

童僕自相語，同居頗不惡。人力免結構，天巧謝雕鑿。清泉傍廚下，翠霧還成幕。我輩日嬉偃，主人自愉樂。雖無柴戟榮，且遠塵囂聒。但恐霜雪凝，雲深衣絮薄。

我聞莞爾笑，周慮愧爾言。上古處巢窟，杯飲皆汗樽。沍極陽內伏，石穴多冬暄。豹隱文始澤，龍蟄身乃存。豈無數尺椳，輕裘吾不溫。邈矣簞瓢子，此心期與論。

謫居糧絕請學于農將田南山永言寄懷

謫居屢在陳，從者有愠見。山荒聊可田，錢鏹還易辦。夷俗多火耕，放習亦頗便。及茲春未深，數畝猶足佃。豈徒實口腹，且以理荒宴。遺穗及鳥雀，貧寡發餘羨。持耒在明晨，山寒易霜霰。

龍岡新構二首

謫居聊假息荒穢亦須治鑿巖薙林條小構自成趣開窗入遠峰架扉出
深樹墟寨俯逶迤竹木互蒙翳畦蔬稍溉鋤花藥頗雜蒔夏適豈專予來
者得全憩輪奐匪致美毋令易傾敝
營茅乘田隙洽旬稱苟完初心待風雨落成還美觀鋤荒旣開徑拓樊亦
理園低檐避松偃疎土行竹根勿剪牆下棘束列因可藩莫樹林間蘿蒙
龍覆雲軒素昧農圃學因茲得深論毋爲輕鄙事吾道固斯存

西園

方園不盈畝蔬卉頗成列分溪免甕灌補籬防豕蹄蕪草稍焚薙清雨夜
來歇濯濯新葉敷熒熒夜花發放鋤息重陰舊書漫披閱倦枕竹下石醒
望松間月起來步閒謠晚酌檐間設酣時藉草眠忘與鄰翁別

水濱洞

送遠憩咀谷濯纓俯清流沿溪陟危石曲洞藏深幽花靜馥常闕溜暗光
亦浮平生泉石好所遇成淹留好鳥忽雙下儵魚亦羣遊坐久塵慮息澹
然與道諍

山石

山石猶有理山木猶有枝人生非木石別久寧無思
來步前庭仰視行雲馳行雲隨長風飄飄去何之行
雲有時定遊子無還期高梁始歸燕題鵲已先悲
有生豈不苦逝者長如斯已矣復何事商山行采芝

秋夜

樹暝栖翼喧螢飛夜堂靜遙寄出晴月低檐入峰影
官然坐幽獨怵爾抱深警年徂道無聞心違迹未屏
蕭瑟中林秋雲凝松桂冷山泉豈無適離人懷故境
安得駕雲鴻高飛越南景

陸廣曉發

初日曛曛似曉霞雨痕新霽波頭沙溪深幾曲雲藏峽
樹老千年雪作花白鳥去邊迴驛路青崖缺處見人家
徧行奇勝才經此汪上無勞羨九華

書庭蕉

檐前蕉葉綠成林長夏全無暑氣侵但得雨聲連夜靜
何妨月色半牀陰新詩舊葉題將滿老芰疎桐恨轉深
莫笑鄭人談訟鹿至今醒夢兩難尋

龍潭夜坐

滁州作

何處花香入夜清
石林茅屋隔溪聲
幽人月出每孤往
悵鳥山空時一鳴
草露不辭芒屨濕
松風偏與葛衣輕
臨流欲寫猗蘭意
江北江南無限情

別希顏

後會難期別未輕
莫辭行李滯江城
且留南國春山興
共聽西堂夜雨聲
歸路終知雲外去
晴湖想見鏡中行
爲尋洞裏幽栖處
還有峰頭雙鶴鳴

登憑虛閣和石少宰韻

南京作

山閣新春負一登
酒邊孤興晚堪乘
松間鳴瑟驚棲鶴
竹裏茶煙起定僧
望遠每來成久坐
傷時有涕恨無能
峰頭見說連閭闔
幾欲排雲尚未曾

題王實夫畫

隨處山泉着草廬
底須松竹偃柴扉
天涯遊子何曾出
畫裏孤帆未是歸
小西諸峰開夕照
虎溪春寺入煙霏
他年還向辰陽望
却憶題詩在翠微

贈潘給事

五月滄浪濯足歸
正堪荷葉製初衣
甲非乙是君休問
酉水辰山志未違
沙鳥不須疑雀舫
江雲先爲埽魚磯
武陵溪壑猶深僻
莫更移家入翠微

登閣江樓

絕頂樓荒舊有名高皇曾此駐龍旌險存道德虛天塹守在蠻夷豈石城
山色古今餘王氣江流天地變秋聲登臨授簡誰能賦千古新亭一愴情

用實夫韻

詩從雪後吟偏好酒向山中味轉佳岩瀑隨風雜鐘磬水花如雨落袈裟

喜雨

南頓作

吹角峰頭曉散軍橫空萬騎下氤氳前旂已帶洗兵雨飛鳥猶驚捲陣雲
南畝漸忻農事動東山休共凱歌聞正思鋒鏑堪揮淚一戰功成未足云

聞曰仁買田霽上携同志待予歸二首

見說相携霽上耕連蓑應已出烏程荒畬初墾功須倍秋熟雖微稅亦輕
雨後湖舸兼學釣餉餘堤樹合閒行山人久有歸農興猶向千峰夜度兵
月色高林坐夜沉此時何限故園心山中古洞陰蘿合江上孤舟春水生
百戰自知非舊學三驅猶魏失前禽歸期久負雲門伴獨向幽溪雪後尋

書草萍驛

九月獻俘北上駐草萍時已暮不怨傳王師已及徐淮遂乘夜速發
次壁間韻紀之二首

戰功成未足奇親征消息尚堪危邊烽西北方傳警民力東南已盡疲
萬里秋風嘶甲馬千山斜日度旌旗小臣何爾驅馳急欲請回鑾罷六師
千里風塵一劒當萬山秋色送歸航堂垂雙白盧頓疏門已三過有底忙
羽檄西來秋黯黯關河北望夜蒼蒼自嗟力盡螳螂臂此口回天在廟堂

三山晚眺

南望長沙杳靄中驚羊只在暮雲東天高雙櫓哀明月江闊千帆舞逆風
花暗漸驚春事晚水流應與客愁窮北飛亦有衡陽鴈上苑封書未易通

宿淨寺二首

十月至杭王師遣人追尋秦復還江西是日遂謝病退居西湖

老屋深松覆古藤羈棲猶記昔年曾棋聲竹裏消閒晝藥裹窗前對病僧
煙艇避人長曉出高峰望遠亦時登而今更是多牽繫欲似當時又不能
常苦人間不盡愁每拚須是入山休若爲此夜山中宿猶自中宵煎百憂
百戰西江方底定六飛南甸尚淹留何人真有回天力諸老能無取日謀

九華山下夜泊

維舟谷口傍煙霏共說前岡石徑微竹杖穿雲尋寺去藤匡採藥帶花歸

諸生晚佩聯芳杜野老春霞綴衲衣風詠不須沂水上碧山明月更清輝
舟夜

隱處看山一葉舟夜深霜月亦兼愁翠華此際遊何地畫角中宵起戍樓
甲馬尚屯淮海北旌旗初放楚江頭洪濤滾滾乘風勢容易開帆不易收
登螺矼次草泉心劉石門韻 二首

中流片石倚孤雄下有馮夷百尺宮灩澦西蟠渾失地長江東去正無窮
徒聞吳女埋香玉惟見沙鷗亂雪風往事淒微何足問永安宮闕草萊中
江上孤臣一片心幾經漂沒水痕深極憐撐住卽從古正恐崩頽或自今
蘚蝕秋螺殘老翠螺鳴春雨落空音好携雙鶴矼頭坐明月中宵一朗吟

元日霧

元日昏昏霧塞空出門咫尺誤西東人多失足投坑塹我亦停車泣路窮
欲斬蚩尤開白日還排閭闔拜重瞳小臣漫有澄清志安得扶搖萬里風

二日雨

昨朝陰霧埋元日向曉寒雲迸雨聲莫道人爲無感召從來天意亦分明
安危他日須周勃痛哭當年笑賈生坐對殘燈愁徹夜靜聽晨鼓報新晴

豐城阻風

前歲遇難于此得北風幸免

北風休嘆北船窮此地曾經拜北風
句踐敢忘嘗膽地齊威長憶射鈎功
橋邊黃石機先授海上陶朱意頗同
況是倚門衰白甚歲寒茅屋萬山中
春日遊齊山寺用杜牧之韻

倦鳥投枝已亂飛林間暝色漸霏微
春山日暮成孤坐遊子天涯正憶歸
古洞濕雲含宿雨碧溪明月弄清暉
桃花不管人間事只笑山人未拂衣
重遊開元寺戲題壁

中丞不解了公事到處看山復尋寺
尚爲婁奴守俸錢至今未得休官去
三月開元兩度來寺僧倦客門未開
山靈似嫌俗士駕溪風攔路吹人回
君不見富貴中人如中酒折腰解醒須
五斗未妨適意山水間浮名于我亦何有

謁伏波廟

樓船金鼓宿烏蠻魚麗羣舟夜上灘
月繞旌旗千嶂靜風傳鈴柝九溪寒
荒夷未必先解服神武由來不殺難
想見虞廷新氣象兩階于羽五雲端